


新校晉書地理志

晉太康二年地記







晉太康三年地記

畢沅集

編主五雲王

編初成集書叢

種一他其及記地年三康太晉

中華民國二十五年十二月初版

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

章

晉太康三年地記

清 畢沅集

司州河南郡

河南郡有東垣縣。沈約宋書州郡志二

右郡垣縣。案晉書地理志無東垣縣故附入郡下

尸鄉故殷湯所都者也。亦曰湯亭。田橫死于是亭。故改曰尸鄉。水經注陽渠水下稱管太康記地道記

右雒陽。案郡國志。醫師有尸鄉。晉省醫師入雒陽。故列此

坎欲聚在鞏西。水經注洛水下 右鞏

河南郡有河陰縣。宋書州郡志二 右河陰

新安縣屬河東郡。同上 右新安

秦建敖倉于成臯。史記正義高祖本紀 右成臯

河南陽城縣是爲土中。夏至之景尺有五寸。所以爲候。太平御覽天部四

陸渾縣屬河南郡。宋書州郡志二 右陸渾

滎陽郡 右京

京鄭太叔段所居邑。史記正義鄭世家

宏農郡

桃林在闌鄉南谷中。水經注。河水下。

右湖

上洛郡

分京兆立上洛郡。屬司隸。宋書州郡志三。

右郡

盧氏屬上洛郡。同上。右盧氏

平陽郡

皮氏縣有介山。子推所逃隱于是。水經注。汾水下。稱晉太康地記及地道記。

右皮氏

河東郡

安邑有司鹽都尉。別領兵五千。太平御覽。州郡部七。

舜受禪安邑。或云蒲阪。太平寰宇記。卷四十六。右安邑

大陽縣有虞原。所謂北虞也。水經注。河水下。右大陽

首山在蒲阪。與胡縣相連。晉書地道記同。蒲阪縣屬河東。宋書州郡志二。

右蒲阪

汲郡

朝歌縣屬汲郡。同上。

右朝歌

河內郡

河陽別縣。非溫邑也。水經注。河水下。稱晉太康志。地道記。

右河陽

廣平郡

廣平縣。屬廣平郡。宋書州郡志一。右廣平

易陽縣。屬廣平郡。同上。右易陽

曲梁縣。屬廣平郡。同上。右曲梁

肥鄉縣。屬廣平郡。宋書州郡志二。右肥鄉

魏郡

魏郡有安陽縣。同上。右安陽

頓邱郡

陰安縣。屬頓邱郡。同上。右陰安

頓邱郡有衛縣。同上。右衛

兗州陳留國

扶溝縣。屬陳留國。同上。右郡。案晉書地理志。無扶溝縣。故附郡下。

烏巢澤在酸棗之東南。昔曹太祖納許攸之策破袁紹軍處也。水經注。濟水下。

右酸棗

濮陽國

燕縣屬濮陽郡。宋書州郡志一。

右濮陽國。案晉書地理志無燕縣故附圖下。

廩丘縣屬濮陽郡。同上。

右廩丘

白馬縣屬濮陽郡。同上。

右白馬

鄆城縣屬濮陽郡。同上。

右鄆城

濟陽郡

離狐縣屬濟陰郡。同上。

右離狐

成武縣屬濟陰郡。同上。

右成武

東平國

須昌縣屬東平國。同上。

右須昌

任城國

樊縣屬任城國。同上。

右樊

濟北國

盧縣屬濟北郡上同

右盧

臨邑縣屬濟北郡上同

右臨邑

阿即東阿也史記索隱列傳四稱太康地理志案史記正義索隱所引皆云太康地理志與他書不同

右東阿

穀城縣屬濟北郡宋書州郡志一

右穀城

蛇邱縣屬濟北郡上同

右蛇邱

豫州

豫州之分其人得中和之氣性安舒其俗阜其人和今俗多寬慢文選注一百五十六太平御覽州郡部四

右州

潁川郡

蓼國先在南陽故縣今豫州鄆縣界故胡城是史記正義楚世家

右鄆

邵陵縣屬潁川郡宋書州郡志二

右邵陵

長平縣屬潁川郡上同

汝南郡

西平縣有龍泉水可以砥礪刀劍特堅利故有堅白之論矣水經注汝南西平有龍泉水可以淬刀劍特

堅利。故有龍泉水之劍。楚之寶劍也。以特堅利。故有堅白之論云。史記索隱列傳九。

右西平

汝陰郡

慎縣。屬汝陰郡。宋書州郡志二。

右慎

孫叔敖。本期思城人。為楚令尹。圖經云。祠廟墜壞。託夢于固始縣令段光。復立祠庭。太平寰宇記卷十一。

右固

始

褒信縣。屬汝陰郡。宋書州郡志二。

右褒信

梁國

梁國有僑縣。太平寰宇記卷十二。隋書作鳥。

右梁國。案晉書地理志。梁國無僑縣。故附國下。

梁孝王築睢陽城。方二十里。以鼓唱節杵而後下和之者。稱睢陽曲。因以為名。藝文類聚居處部三。睢陽城方十三里。梁孝王築。以鼓唱節杵而後下和之者。稱睢陽曲。今躡以為故。所以樂家有睢陽曲。蓋采其遺音也。

史記索隱。梁孝王世家。宋王偃之時。諸侯皆曰桀宋。桀宋。言其似桀也。
史記索隱。宋世家。案晉書地理志。睢陽。春秋時宋都。故附于此。

右睢陽

寧陵縣。屬梁國。宋書州郡志二。

右寧陵

東郡

陳屬梁國上同 右陳

項縣屬陳郡上同 右項

苦縣屬梁國上同 城東有賴鄉祠老子所生地漢書地理志八下 右苦

譙郡

譙縣屬譙郡上同 右譙

城父縣屬譙郡上同 右城父

鄆縣屬譙郡上同 右鄆

山桑縣屬譙郡上同 右山桑

龍亢縣屬譙郡上同 右龍亢

銓縣屬譙郡上同 右銓

魯郡

奚仲家在薛城南二十五里山上百姓爲之神靈也水經注泗水下

奚仲遷于邳後仲虺居之以爲湯左相當周爵稱侯後見侵削霸者所繼爲伯任姓也上同

右薛

弋陽郡

楚城邾遷其人于江南因名縣史記索隱高祖本紀右縣

斬春縣改屬弋陽郡太平寰宇記一百二十七右斬春

安豐郡

安風縣屬安豐郡宋書州郡志二右安風

松滋縣屬安豐郡同上右松滋

冀州平原國

在平縣屬平原國同上右在平

平原郡有西平昌縣宋書州郡志二稱漢平昌縣晉太康地志曰西平昌

樂陵國

厭次縣屬樂陵國同上右厭次

陽信縣屬樂陵國同上右陽信

潔沃縣屬樂陵國同上右潔沃

章武國

章武縣屬章武國同上右章武

右西平昌

河閒國

武垣縣屬河閒國同上

右武垣

中水縣屬河閒國同上

右中水

成平縣屬河閒國同上

右成平

高陽國

高陽國有北新城同上漢新城縣晉太康地志高陽並曰北新城

右北新城

蠡吾縣屬高陽國同上

右蠡吾

博陵郡

安平縣屬博陵郡同上

右安平

清河國

清河國有清河縣同上

右清河

常山郡

常山曲陽有恆山坂號飛狐口太平御覽地部十八

右上曲陽

故行唐縣西北有仙人巖太平寰宇記卷六十一

行唐縣北二十里有夫人城。即王神女所築。同上。

右南行唐

幽州范陽國

涿有長鄉。水經注。聖水下。

右長鄉

燕國

安次縣屬燕國。

宋書州郡志二。

右安次

軍都縣屬燕國。

太平寰宇記卷六十九。

右軍都

廣甯郡

潘縣更屬廣甯郡。

太平御覽州郡部八。太平寰宇記卷七十。

右潘

涿鹿城東一里有阪泉。

上有黃帝祠。水經注。灤水下。阪泉亦地名也。泉水東北流。與蚩尤泉會。水出蚩尤城。無東

面。同上。右涿鹿

遼西郡

肥如縣有碣石山。碣然而立。在海旁。故名。

通典州郡八。秦築長城。起自碣石。在今高麗舊界。非碣石山也。

太平寰宇

記卷七十。

右肥如

平州樂浪郡

遂城縣有碣石山。長城所起。史記索隱

右遂城

并州上黨郡

上黨壺關縣有羊腸坂。太平御覽

右壺關

銅鞮。故晉大夫羊舌赤邑。時號赤爲銅鞮。伯華。漢以爲縣。太平御覽

右銅鞮

西河國

西河有中陽城縣也。水經注

右中陽

樂平郡

樂平縣。本名沾縣。漢之故縣矣。水經注

右沾

樂平郡有受陽縣。水經注

右受陽。案晉書地理志作壽陽。

雁門郡

廣武縣。屬雁門郡。宋書州郡志二

右廣武

秦時建此城。輒崩不成。有馬周旋馳走反復。父老異之。因依以築城。遂爲馬邑。太平御覽

右馬邑

新興郡

秦塞自五原北九里。謂之造陽。東行終利賁山南。漢陽西是也。史記索隱

列傳五十造陽在五原塞。塞下據通九里。

太平寰宇
記卷十七
右九原案五原縣本屬九原郡

自北地郡北行九百里五原塞即此地後漢光祿徐自爲出五原塞數百里築城障列亭至盧胸山即今縣北光祿塞是也太平御覽州郡部十 右雲中

雍州

雍州兼得梁州之地西北之位陽所不及陰氣壅遏故取名焉藏文類聚地部一 雍州西北之位陽所不及陰氣壅遏故名雍州太平御覽州郡部十 以其四山之地故以雍名焉亦謂西北之位陽所不及陰氣壅閉也宋敏求長安志卷二

右州

京兆郡

京兆郡有霸城縣宋書州郡志三 右霸城案兩漢名霸陵縣

藍田出美玉故曰藍田長安志卷十六 右藍田

京兆郡有高陸縣水經注渭水下高陵縣晉太康地志謂之高陸也

時在櫟陽故城內其時若畦故曰畦史記索隱本紀七

扶風郡

右高陸

右萬年案晉書地理志萬年故櫟陽縣

池陽縣屬京兆郡宋書州郡志三

扶風池陽縣有鬼谷先生所居。長安志卷十九

右池陽

郿縣屬秦國。宋書州郡志三

右郿

雍縣。號叔之國。水經注渭水下

右雍

汧縣有蒲谷鄉弦中谷。乃雍州之蒲也。太平寰宇記卷三十二

右汧

秦文公時。陳倉人獵得獸若麋。不知名。牽以獻之。逢二童子。童子曰。此名爲媼。常在地中。食死人腦。即欲

殺之。拍捶其首。媼亦語曰。二童子名陳寶。得雄者王。得雌者霸。陳倉人乃逐二童子。化爲雄雌。上陳倉北

阪爲石秦祠之。史記正義秦本紀六

陳倉縣屬秦國。宋書州郡志二

右陳倉

安定郡

安定郡。領臨涇、朝那、烏氏、鶉觚、陰密、西川六縣。太平寰宇記卷三十二

右郡。案晉書地理志。安定領縣七。有都盧縣。

始平郡

始平郡有始平縣。宋書州郡志三

右始平

武功縣屬始平郡。同上

右武功

鄠縣屬始平郡。同上

右鄠

涼州金城郡

白土縣有園水。史記索隱列傳五十稱園水出上郡白土縣太康地志園作圃。

右白土郡。案漢白土縣屬上三國時移屬。

西海郡

河北得水為河。塞外得水為海也。史記正義傳六十三。

右郡

秦州隴西郡

河關縣屬隴西郡。宋書州郡志三。右郡。案晉書地理志隴西無河關縣故附郡下。

烏鼠山在隴西首陽縣西南。鼠尾短形如家鼠。入山四尺。鼠在內。鳥在外。為牝牡。藝文類聚獸部下。

右首陽

南安郡

南安郡有中陶縣。宋書州郡志三。

右中陶

天水郡

上邽屬天水郡。宋書州郡志三。太平寰宇記一百五十七。

右上邽

天水郡有顯新縣。同上。

右顯新

略陽郡

略陽屬天水郡。同上。

右郡

略陽縣屬略陽郡同上 右略陽

清水縣屬略陽郡同上 右清水

陰平郡

陰平郡故廣漢屬國都尉宋書州郡志三 右郡

陰平郡有陰平縣同上 右陰平

梁州梓潼郡

梓潼郡劉氏分廣漢立宋書州郡志三 右郡

梓潼縣出傘子鹽太平御覽飲食部二十三 右梓潼

梓潼郡有漢德縣宋書州郡志三 右漢德

白水縣屬梓潼郡同上 右白水

廣漢郡

廣漢郡屬梁州同上 右郡

德陽縣屬廣漢郡同上

涪陵郡

省丹興縣。涪陵郡移理漢復。太平寰宇記一百二十。

右漢復

巴西郡

西南二充國。並屬巴西。宋書州郡志三。

右西充國

巴東郡

巴東郡。屬梁州。同上。

巴東郡。有漢昌縣。同上。

右郡。案晉書地理志。巴東無漢昌縣。故附郡下。

益州蜀郡

江沱在繁縣。水經注江水下。

右繁

犍爲郡

牛鞞縣。屬犍爲郡。宋書州郡志四。稱犍縣二。漢晉太康地志並曰牛鞞。

右牛鞞

汶山郡

汶山郡。漢武帝立。孝宣地節三年合蜀郡。劉氏又立。同上。

右郡

升遷縣。屬汶山郡。同上。右升遷

都安縣。屬汶山郡。同上。太平寰宇記七十三。右都安

興樂縣。本名白馬。屬汝山。太康元年更名。同上

右興樂

漢嘉郡

徙陽縣。屬漢嘉郡。同上

右徙陽

旄牛縣。屬漢嘉郡。同上

右旄牛

江陽郡

漢安縣。屬江陽郡。同上

右漢安

朱提郡

南廣縣。屬朱提郡。同上

右南廣

漢陽縣。屬朱提郡。同上

右漢陽

堂狼縣。屬朱提郡。同上

右堂狼

牂柯郡

廣談縣。屬牂柯郡。宋書州郡志四

右廣談

寧州雲南郡

雲南郡。故屬永昌。同上

右郡

雲南縣屬雲南郡上同

右雲南

青蛤縣屬雲南郡上同

右青蛤

雲南青蛤縣出碧太平御覽珍寶部八

姑復縣屬雲南郡宋書州郡志四

右姑復

樸榆縣屬雲南郡上同

右樸榆

興古郡

興古郡故牂柯上同

右郡

罽封屬興古郡上同

右罽封

建寧郡

建寧郡有存驅縣上同

右存驅

建寧郡有新定縣上同

右新定

母單縣屬建寧郡上同

右母單

穀昌縣屬建寧郡上同

右穀昌

連然縣屬建寧郡上同

右連然

秦臧縣屬建寧郡上同

右秦臧

雙柏縣屬建寧郡上同

右雙柏

建伶縣屬建寧郡上同

右建伶案晉書地理志有冷邱無建伶當即是

演池縣屬建寧郡上同

右演池

永昌郡

比蘇縣屬永昌郡上同

右比蘇

青州

青州東方少陽其色青其氣清歲之首事之始也故以為名周之建國表齊東海居于青州故吳季札觀

樂于魯聞齊之詩曰泱泱乎大國之風也其表東海者乎藝文類聚地部

右州

齊國

般陽縣屬齊國宋齊州郡志二

右國案晉書地理志無般陽縣故附圖下

濟南郡

下密縣屬北海郡上同

右下密

膠東縣屬北海郡上同

右膠東

卽墨縣屬北海郡同上

右卽墨

樂安國

東朝陽屬樂安國同上

右東朝陽

城陽郡

城陽姑幕縣有五色土封諸侯錫之茅土用爲社史記正義

右姑幕

淳于縣屬城陽郡宋書州郡志二

右淳于

東武縣屬城陽郡同上

右東武

高密縣屬城陽郡同上

右高密

黔陬縣屬城陽郡同上

右黔陬

平昌縣屬城陽郡同上

右平昌

昌安縣屬城陽郡又夷安營陵二縣並屬城陽同上

右昌安案晉書地理志無夷安營陵二縣故附此

長廣郡

不其縣屬長廣郡同上

右不其

長廣縣屬長廣郡同上

右長廣

挺縣屬長廣郡上同

右挺

徐州彭城郡

泗水出磬石書所謂泗濱浮磬者也水經注泗水下

右呂

下邳國

下邳縣屬下邳國宋書州郡志二

右下邳

陵縣屬下邳武帝以南有廣陵故曰北陵太平寰宇記卷十七

右陵案晉書地理志陵作凌

良城縣屬下邳國宋書州郡志二

右良城

僮縣屬下邳國上同

東海郡

故祝其城在郟東九十里太平寰宇記卷二十二

右郟

琅邪國

陽都縣屬琅邪國宋書州郡志二

右陽都

卽邱縣屬琅邪國上同

右卽邱

費縣屬琅邪國上同

右費

東安縣屬東莞郡上

右東安案晉書地理志東安縣屬琅邪

東莞郡

朱虛縣屬城陽郡上

右朱虛

安邱縣屬琅邪國上

右安邱

蓋縣屬樂安上

右蓋

劇縣屬琅邪國上

右劇

廣陵郡

淮陰縣屬廣陵郡上

右淮陰

淮浦縣屬廣陵郡上

右淮浦

臨淮郡

東陽縣屬臨淮郡上

右東陽

司吾縣屬臨淮郡上

右司吾

下相縣屬臨淮郡上

右下相

徐縣屬臨淮郡上

右徐

荊州

荊州統郡二十有二。胡三省實治通鑑注晉紀五。

荊州于古蠻服之地。郡以上太平御覽州也。秦滅楚置郡縣。漢武分爲交州。至魏晉荊州所部郡國二十。文獻

類聚地部稱晉元康地志今附錄。

右州

江夏郡

平春縣屬義陽郡。宋書州郡志三。

右平春

鄆縣屬義陽郡。同上。

右鄆

南郡

陶朱冢在華容縣西南。水經注夏水下。

右華容

南郡有鄆縣。宋書州郡志三。案漢志鄆郡作若。

右鄆

旌陽疑是吳所立。同上。

右旌陽

咸寧案今寫本寧誤作康三年以松滋流戶在荆土者立松滋縣。太平寰宇記卷一百三十二。

右松滋

襄陽郡

臨沮屬襄陽郡。宋書州郡志三。

右臨沮

山都屬襄陽郡同上

右山都

南陽郡

陳倉人所逐二童子名寶雞者雄止陳倉爲石雌止此縣故名雉縣漢書地理志八上

右雉

自華至比陽南北連百里號爲方城亦曰長城太平御覽州郡十四

右比陽

武關當冠軍縣西史記索隱本紀七 嶢關在武關之西

右冠軍

順陽郡

魏武帝建安中分南陽立南鄉郡晉武帝改曰順陽郡是也史記索隱世家二十三

義陽郡

義陽郡以南陽屬縣爲名水經注淮水下義陽郡屬荊州宋書州志三 右郡

周宣王舅所封故鄧城在襄州安養縣北二十里春秋之鄧國莊公十六年楚文王滅之服虔曰鄧曼姓

史記正義楚世家

隨縣屬義陽郡宋書州志三

右隨

棘陽縣屬義陽郡同上

右棘陽

義陽郡有厥西縣同上

右厥案厥西當卽此

新城郡

新城郡有沅音縣。同上。

右沅鄉案水經注云。沅鄉。魏晉書地理志及沈志並作沅鄉。惟太康志作沅也。

魏興郡

安康縣屬魏興郡。太平寰宇記一百四十一。

右安康

上庸郡

上庸縣屬上庸郡。宋書州郡志三。

右上庸

上庸郡有富安縣。同上。稱安富縣。晉太康地志。永初郡國。何徐並作富安。

右富安

建平郡

建平郡有泰昌縣。同上。

右泰昌

秭歸有歸鄉。故夔子國。楚滅之。水經注。江水下。

右秭歸

宜都郡

宜都郡。吳分南郡立。同上。

右郡

南平郡

作唐縣。屬南平郡。宋書州郡志三。

右作唐

孱陵縣屬南平郡同上

右孱陵

武陵郡

龍陽縣吳立同上

右龍陽

武陵郡有黠陽縣同上

右黠陽

武陵郡有舞陽縣同上

右舞陽

天門郡

天門郡有澗中縣同上

右澗中

湘東郡

臨烝縣屬湘東郡同上

右臨烝

武昌郡

柴桑縣屬豫章郡宋書州郡志二

右柴桑

武昌郡鄂縣此為東鄂也水經注江水下

右鄂

安成郡

安成郡有廣興縣宋書州郡志二

右廣興

揚州丹陽郡

吳有太初宮。方三百丈。權所起也。昭明宮。方五百丈。皓所作也。裴松之吳志三注。稱晉太康三年地志。

右建鄴

宣城郡

梅根鐵冶出青。其色特妙于廣州。太平寰宇記卷一百五。

右春穀。案春穀縣有梅根山。

淮南郡

下蔡縣。屬淮南郡。宋書州郡志二。

右下蔡

東海復有曲陽。故此爲西曲陽縣。太平寰宇記一百二十七。

右西曲陽

平阿縣。屬淮南郡。宋書州郡志二。

右平阿

塗山。古一作有。當塗國。夏禹所娶也。西南又有禹邨。蓋禹會諸侯于塗山。在禹貢揚州之域。今九江當塗縣

有禹娶之地。今邑界有當塗山。故城存焉。卽漢縣。後廢。太平御覽州郡部八。當塗山。在壽春東北。今驗無差。太平寰宇記一

百二十七。右當塗

烏江縣。屬淮南郡。宋書州郡志二。

右烏江

廬江郡

廬江郡。治皖。更徙居于舒。太平寰宇記一百二十五。

右舒

毗陵郡

吳王濞反。走丹徒。越人殺之于此城。史記正義世家二十七。

右丹徒

吳封季札州來。而居延陵。故曰延州來。太平寰宇記卷八十九。

右延陵

吳郡

吳有鹽官縣。水經注：江水下。稱晉太康地記。晉地道記。漢鹽官也。太平寰宇記九十三。

右鹽官

吳興郡

陽羨縣。本名荆谿。史記索隱本紀八。

右郡案晉書地理志吳興無陽羨。魏序則云分吳興之陽羨。等立義與郡則知吳興郡當有陽羨縣。或誤脫也。

會稽郡

上虞舜避丹朱于此。故以名縣。百官從之。故縣北有百官橋。亦云舜與諸侯會事訖。因相娛樂。故曰上虞。

水經注：漸江水下。 右 上虞

會稽郡有始寧縣。宋書州郡志一。案惟此縣下。稱晉太康三年地志。

右始寧

臨海郡

章安。本鄞縣南之回浦鄉。章帝章和元年立。續漢書郡國志四。稱晉元康地志。宋書州郡志。稱太康志同。

右章安

吳分章安。置臨海縣。屬會稽郡。少帝時。置臨海郡。又屬焉。太平寰宇記卷九十八。

右臨海

建安郡

建安郡有建陽縣。宋書州郡志一。

右建陽

建安郡有將樂縣。同上。右將樂

鄱陽郡

鄱陽郡有上饒縣。宋書州郡志二。

右郡。案晉書地理志無上饒縣。故附郡下。

廬陵郡

南野有大庾嶺。嶺峻阻。螺轉上險九磴二里。至頂下七里。平行十里至亭。一名橫亭。一名塞上嶺。太平御覽地部

十九。太平寰宇記一百八。右南野

南康郡

贛縣屬南康郡。因水以爲名。同上。右贛

交州

交州本屬揚州。取交趾以爲名。虞之南極也。周有天下。越裳氏慕聖人之德。重九譯貢白雉。秦滅六國。南開百越。置桂林、象郡。以趙佗爲龍川令。因秦之末。自擅南裔。漢高革命。加以王爵。始變椎髻。襲冠冕焉。文苑類聚

地部。右州

合浦郡

朱厓儋耳無水。惟種大瓠藤。斷其汁用之。亦足。太平御覽

右徐聞

交阯郡

平道縣屬交阯。水經注淹水下案晉書地理志無此縣故附郡。

右郡

武寧縣屬交阯郡。同上。

右武寧

武平郡

武平郡有□□縣。宋書州郡志四武平郡下有闕簡文云吳錄無晉太康地志有案今本武平郡下有吳定新道晉化三縣則此所云有者當屬武興以下等縣更當求善本校。

右郡

廣州南海郡

南海郡有博羅縣。宋書州郡志四稱二漢皆作傳字晉太康地志作博。

右博羅

臨賀郡

臨賀縣屬南海郡。宋書州郡志四稱晉太康地記王隱云。

右臨賀

蒼梧郡

元谿縣屬蒼梧郡。同上。

右元谿

臨允縣屬蒼梧郡上同

右臨允

都羅縣屬蒼梧郡上同

右都羅

武城縣屬蒼梧郡上同

右武城

桂林郡

桂林郡有常安縣上同

右郡案晉書地理志無常安縣

高涼郡

高涼郡有思平縣上同

右思平

高興郡

廣化縣屬高興郡上同

右廣化

海安縣屬高興郡上同

右海安

莫陽縣屬高興郡上同

右莫陽

寧浦郡

武帝太康七年改合浦屬國都尉立上同

右郡

寧浦縣本名昌平武帝太康元年更名上同

右寧浦

寧浦郡有平山縣。同上。

右平山

寧浦郡有始定縣。同上。

右始定。案晉書地理志無始定縣。

都盧國

都盧國其人善緣高。李善文選注卷二。



新校晉書地理志

方 愷 撰

本館據史學叢書
本排印初編各叢
書僅有此本

新校晉書地理志

晉書地理志列十三州。州凡三篇。前篇紀漢魏立州郡之始。中篇列晉代郡縣。後篇紀惠帝以後增損之制。閒有太康三年更革州郡。亦附後篇。如秦甯二州。而冠以總序。此其大要也。然中篇郡縣不列年分。綜核全志。有荆、揚、交、廣。則爲太康元年平吳之後可知也。有秦、甯二州。則爲太康三年未及并省以前又可知也。乃東莞、順陽等郡下。又注太康中置。則本書自爲矛盾矣。然太康二三年事。猶可強稱曰中。若總序稱太康元年既平孫氏。凡增置郡國二十有三。內有新野、隨郡。而於荊州乃列後篇。爲惠帝增立。不入郡國一百七十三之數。則太康增置僅二十一。合之漢、魏、蜀、吳舊制。僅一百七十一矣。又以各州中篇所列郡國。司十二。兗八。豫十。冀十三。幽七。平五。并六。雍七。涼八。秦六。梁八。益八。甯四。青六。徐七。荆二十二。揚十八。交七。廣十。合計亦僅百七十二。此又數之訛謬也。又總序太康增置郡國內有甯浦郡。而廣州中篇甯浦郡下。則曰吳置。總序前言魏武所置。有略陽、陰平。魏文所置。有義陽。乃此三郡又在太康增置二十三郡國之列。復考之秦州中篇。略陽、陰平。又皆云秦始中置。荊州中篇。義陽。則又云太康中置。此又文之訛謬也。又凡戶口增損之數。月異歲殊。地志所載。必以極盛一年爲斷。而臚列郡縣。亦斷於是年。故前漢地理志。郡縣戶口斷於元始二年。續漢郡國志。郡縣戶口斷於永和五年。今考本志總序。紀太康元年戶口之數。而中篇所列之郡。有順陽、義陽爲太康中置。宣城爲太

康二年置晉安南康爲太康三年置是郡國下散載戶口與總序不相合則當以何年爲定此又體例之訛謬也一序之內紛紜舛錯披讀全志羣疑叢生爰據本書紀傳諸志載述異同又取杜預張華京相璠皇甫謐劉逵諸儒著述皆身當其時疏列異說以相證引又據東晉郭璞王隱常璩闕駟諸人書用證西晉中原板籍若沈約州郡志魏收地形志酈道元水經注則惟取西晉沿革以校此志之失其唐以後地志考證西晉郡縣有獨標異義者亦閒及之與此志抵牾非復一條誦讀之暇輒爲辯證一卷至于江左中興以後校本志諸州後篇舛誤各條則已見洪氏亮吉東晉疆域志十六國疆域志無煩末學贅言故悉從缺略是爲序陽湖方愷

新校晉書地理志

清陽湖方愷撰

司州

河南郡

案續漢郡國志劉昭注引皇甫謐帝王世紀曰尸鄉在偃師縣西三十里水經注引太康地道記同郭璞山海經穀水注云今穀水出穀陽谷東北至穀城縣入洛河左氏隱十一年傳吾先君新邑于此杜預注云此今河南新鄭據此知晉時有偃師穀城新鄭三縣皆當從續漢志屬河南郡寰宇記謂偃師晉併入洛陽又云西晉省穀城縣入河南蓋援本志望文生義耳翊寅謹案郡國志宏農郡有新安云澗水出魏郡志言晉太康地志屬河東誤也地理志穀城禹貢澗水出師古曰即今新安郡國志穀城有函谷關本志云新安函谷關所居是西晉時穀城省并入新安矣郭璞注有穀城縣蓋東晉復置

滎陽郡

案左氏襄十八年傳遂涉潁次于旃然杜注旃然水出滎陽成皋縣東入汴昭五年傳子太叔勞諸索氏杜注又云河南成皋縣東有大索城一縣不應兩屬未詳孰是又隱元年經鄭伯克段于鄆杜注在滎陽宛陵縣西南苑宛古通寅案地形志苑陵二漢屬河南晉屬汝陽有新鄭城鄭莊公廟據此是新鄭晉時已并入苑陵矣汝陽當是滎陽之譌又案魏收地形志注成皋晉屬河南後屬滎陽疑杜預時已改屬此郡後人誤用本志改竄昭五年注文耳又案寰宇

記。晉太始二年。分河南置陽翟郡。以密縣屬焉。未詳所本。又本書魏舒傳。遷宜陽。滎陽二郡太守。在文帝時宜陽郡。或至武帝時已廢滎陽郡。則非泰始二年始置明矣。

宏農郡

案本書載記。晉華山太守董邁降姚興。胡三省云。晉分宏農之華陰。京兆之鄭。馮翊之夏陽。置華山郡。考杜氏隱十一年注。謂鄭在京兆。桓九年注。謂梁在馮翊。夏陽。杜氏春秋釋例。謂渭水至宏農華陰縣入河。郭璞注爾雅山海經。華山皆言華陰屬宏農。疑此郡置在東晉中年也。隄池。杜氏信三十二年注作灑池。寅案二漢志作隄。魏志作灑。

平陽郡

左氏僖十五年傳。明年其死于高粱之墟。杜注在平陽楊氏縣西南。又昭二十八年傳。僚安爲楊氏大夫。注平陽楊氏縣。疑楊縣當作楊氏。僖九年。高粱注在平陽縣西南。脫縣名矣。又二十四年。高粱注作楊。脫氏字。

河東郡

杜注。左氏傳襄元年。寘諸瓠邱云。河東東垣縣有壺邱。郭注山海經。王屋山今在河東東垣縣。州郡志稱太康地志有東垣縣。是此郡垣縣當作東垣也。寅案州郡志。司州河南領東垣云。二漢晉太康地志有東垣縣。今攷漢志。河東郡有垣縣。無東垣。亦不屬河南。疑沈

志當云屬河東也。

又州郡志司州刺史下云新安晉太康地志屬河東疑州郡志傳寫之譌此河東當作河南

又案郭注爾雅漢大出尾下條郭注山海經踰之山條皆云今河東汾陰縣有漢水杜氏文六年傳

改蒐于董注亦謂河東汾陰縣有董亭本志作汾陽疑誤寅案汾陽二漢志皆作汾陰本志乃傳寫之譌

汲郡

左氏隱十一年傳注橫茅隕二邑在修武屬汲郡與本志合山海經西山經郭注今河內修武縣北黑山亦出清水水經注清水篇引京相璠曰河內修武有隕城疑西晉末改屬也

河內郡

續漢郡國志河內郡有武德縣石勒載記勒攻冠軍將軍梁巨於武德水經注沁水篇引闕駟言泝水至武德入河疑此縣西晉時尙存

廣平郡

劉庠案本志前篇言魏氏受禪即都漢宮司隸所部河南河東河內宏農并冀州之平陽合五郡置司州無廣平郡而廣平郡下乃又言魏置則魏時司州有六郡矣寅案郡國志注建武十三年省廣平國以其縣屬鉅鹿州郡志亦言建武十三年省并鉅鹿魏分鉅鹿魏郡復為廣平又地形志曲梁縣云魏黃初二年復置郡治洪氏縣城以益魏郡則廣平之省當在建安末沈志言建武中省蓋本范書光武紀而不言何時復立疏矣

劉逵魏都賦注。溫水在廣平都易縣。都易字疑有誤。郡國志注作易陽是也。又注云。龍山在廣平沙縣。卽本志之涉。志誤也。寅案郡國志魏郡沙侯國劉昭引魏都賦注曰有龍山是沙縣不當作涉矣地理志以涉爲傳寫魏郡有沙縣惟王子侯表作涉侯魏武紀水經注元和志異字記並作涉王氏雜志之譌恐非又斥漳郡國志地形志皆作斥漳。又本書程衛傳。衛廣平曲周人。案曲周前漢屬廣平。後漢屬鉅鹿。疑晉初仍屬廣平。本志不載。未詳。寅案州郡志云曲周太康地志屬廣平作曲周梁本志曲下脫周字

陽平郡

郡國志地形志。清泉皆作清淵。本志作于唐。太宗時避諱改。非真名也。又地形志。陽平郡武陽。晉屬東郡。曰東武陽。後改屬本志。此縣旣屬陽平。則應曰武陽。若仍稱東武陽。則應屬東郡。始與地形志合。又州郡志。發于令漢舊名。屬東郡。太康地志無。地形志言晉屬陽平。疑太康時省。惠帝後復置。又州郡志。樂平令前漢曰清。屬東郡。章帝更名。晉太康地志無。地形志言晉屬陽平。蓋亦非太康舊制矣。

魏郡

鄴。晉愍帝諱也。州郡志云。江左避諱改曰臨漳。本志或于此斷爲太康地名。則當別見。後篇概從刪削。似缺晉典。

頓丘郡

左氏僖二十三年傳。出于五鹿。杜注。今衛國縣西北有地名五鹿。三國魏志。建安十七年。以東郡之衛國

益魏郡。地形志：衛國晉屬頓丘。州郡志：衛國令。晉太康地志有案。據各書本志：衛下脫國字。春秋文元年，公孫敖會晉侯于戚。杜注：在頓丘衛縣西。亦有譌脫也。水經注：河水篇引京相璠曰：今衛國縣西北三十里有五鹿地。今屬頓丘縣。

兗州

陳留國

地形志：扶溝晉屬陳留。又州郡志亦云：扶溝太康地志屬陳留。志缺。又地形志：圉城晉曰圉，屬陳留。後罷。州郡志言太康記無此縣。未詳孰是。本書江統、江適傳皆陳留圉人。是晉初當有是縣。或太康末始省歟。又蔡豹、陳留圉城人。見豹傳。又案本書元敬虞皇后傳：后為濟陽外黃人。隱逸范粲傳又云：粲陳留外黃人。志列外黃於此。未詳孰是。又蔡謨傳：謨陳留考城人。考城東漢縣。疑晉時尚存。寅案州郡志：晉惠分陳留為濟陽國。領縣二：考城、鄆城。又太康地志：陳留無考城縣。

濮陽國

州郡志：南濮陽太守。本東郡。晉武帝咸甯二年，以封子允，以東不可為國名。東郡有濮陽縣，故曰濮陽國。濮陽，漢舊名也。允改封淮南，還為東郡。趙王倫篡位，廢太孫臧為濮陽王。王尋廢，郡名遂不改。據沈約說，是晉武帝改東郡為濮陽，非分置也。地形志：東郡秦置。晉改濮陽。後復，其屬縣曰東燕、曰白馬，皆晉屬濮

陽。後屬東郡。曰酸棗。曰長垣。皆晉屬陳留。後屬東郡。又有濮陽郡。云晉置。其屬縣曰廩丘。曰濮陽。曰鄆城。皆晉屬濮陽。曰城陽。晉屬濟陰。後屬濮陽。據魏收說。是晉復立東郡之後。與濮陽郡分統諸縣也。左傳注。隱五年之燕縣。定八年。哀十六年。注亦有東郡燕縣。莊十四年之鄆城縣。僖十三年。宣十二年之濮陽縣。成十六年。襄二十六年之廩丘縣。襄二十四年之白馬縣。皆云屬東郡。據杜預說。又本書文苑成公綏傳。綏東郡白馬人。是但有東郡。別無濮陽郡也。太康地志。鄆城。白馬。燕三縣屬濮陽。廩丘。濮陽二縣。未詳所屬。據沈約所引。太康志說。是但有濮陽郡。別無東郡也。各說互滑。巧歷不能算。是非不可決。若燕縣則西晉時仍在。諸說俱同。又案水經注。瓠子河篇。京相璠曰。清丘在今東郡濮陽縣東南三十里。魏都尉治。又曰。今東郡廩丘縣南有羊角城。又曰。東郡廩丘縣南三十里有故郟都。又曰。今東郡廩丘縣東八十里。有故蓮城。參考衆說。似西晉時兩郡俱存也。又本書鄭袤附傳。子默武帝時爲東郡太守。劉喬傳。河閒王顥以喬長子祐爲東郡太守。郗鑒附傳。叔隆爲東郡太守。在趙王倫專政之前。魏浚傳。浚東郡東阿人。又可爲西晉有東郡之證。乃本志司州前言廢東郡立頓丘。後篇又不載復立東郡。不詳何據。

濟陽郡

此濟陽郡當作濟陰。今考洪氏亮吉。東晉疆域志。濟陽郡。下云。沈志。晉惠分陳留爲濟陽國。濟陰郡。下云。案晉志。兗州有濟陽郡。領定陶等九縣。此濟陽實濟陰之譌。而惠帝分置之濟陽。則志反闕之。洪氏說是。

也。又案左傳隱八年注。濟陽句陽縣東北有垂亭。此刊本因晉志誤也。爾雅再成爲陶邱。郭璞注。今濟陰定陶城中。左桓四年注。曹國今濟陰定陶縣是也。本書卻說傳。說濟陰單父人。卞壺傳。壺濟陰宛句人。足證陽爲陰之誤。寅案錢氏攷異曰。漢無濟陽郡。蓋濟陰之誤。今攷州郡志於城武離狐二縣。並云晉太康地志屬濟陰。可證濟陽當作濟陰。杜佑通典云。濟陰郡。晉爲濟陽郡。非也。

高平國

高平屬邑。在漢均屬山陽。晉改山陽爲高平。本志云。故屬梁國。晉初分山陽置。文有譌奪。又案太康以前。並無高平。王似不當作國。互見魯郡下。

東平國

郡國志。濟北國有剛縣。杜氏哀八年注。東平剛縣北有闡亭。字亦作岡。水經注。汶水西南過岡縣北。京相璠曰。岡縣西四十里有闡亭。剛岡通。隱五年傳。邾人侵衛。注。東平剛父縣西南有邾鄉。父字衍。地形志。剛晉曰剛平。後改。

濟北國

本書魏浚傳。浚東郡東阿人。與志異。必有一誤。

泰山郡

庠案郡國志。泰山南城故屬東海。有東陽城。左氏襄十九年。城武城。杜注。泰山南武城縣。而哀八年。

吳師伐晉既克武城。又克東陽。史記曾參南武城人。章懷後漢注。南城曾子父所葬。是南城即南武城也。又哀十四年。丘輿杜注云。泰山南城縣西北有輿城縣。據杜預注。左氏皆作南城。不作南武城。可證襄十九年。杜注之泰山南武城縣。言泰山之南有武城縣也。

本書兩羊后及羊祜傳。皆云泰山南城人。無武字。庠案羊祜傳云。詔以泰山之南武陽平。南城。梁父。平陽。五縣為南城郡。封祜為南城侯。祜卒。仍聽復本封。今志

無南城郡而泰山郡下又無南城縣。杜氏隱六年注。泰山牟縣東南有艾山。地形志。牟。漢晉屬泰山州郡志。同。是泰山屬

邑為牟。非東牟也。漢東牟縣屬青州東萊郡。不當在此互見。青州東萊郡。庠案羊祜傳。泰山郡亦作牟。不以牟為東牟。皆誤也。又左傳宣八年杜注。今泰山有平陽縣。知新泰之改或在武帝末。州郡志東莞郡下云。新泰

令魏立屬泰山。杜氏親當其時。不應捨新號取舊名。沈說似誤。本志缺更名年分。亦失考證矣。庠案地理

氏徵麟云。左宣公八年城平陽。杜注。今泰山有平陽縣。案州郡志。兗州高平郡有平陽縣。疑此縣太康初

有之。不知廢于何時。而南宋復立。改屬高平也。竊案平陽改名新泰。據水經注。在晉武元康九年。元

康非武帝年號。或以為太康之誤。或以為武帝當作惠帝。而州郡志地形志。皆以為魏立。與鄗注亦不相

合。元和郡縣志。又云。泰始中。鎮南將軍羊祜表。改為新泰縣。則杜預注。傳在祜卒後。不當復云。今有平陽

和志。可無論矣。鄗注云。元康中改。說蓋可從。

豫州

潁川郡

郡口志注引臯甫謚帝王世紀曰。魏文帝登禪于曲蠡之繁陽亭。為縣曰繁昌。今潁川繁昌是也。州郡志。

繁昌令漢舊名本屬潁川魏分潁川爲襄城又屬焉晉亂襄城郡以此縣屬淮南案繁昌實爲魏置非漢舊名沈說似誤又州郡志西華漢舊縣屬汝南晉初省惠帝永康元年復立屬潁川本書荀勗傳子藩元康中封西華縣公是此縣至西晉尙存也本志前後篇俱不載實案地形志潁川領曲陽縣云後漢屬下邳晉罷後復屬潁川本志後篇亦不載

汝南郡

左傳襄四年注繁陽在汝南銅陽縣南據杜說南頓當屬汝陰銅陽當屬本郡互見汝陰下濯陽刊本或作濯陽誤實案後漢書吳漢傳濯陽侯注云濯陽縣名屬汝南郡在濯水之陽因以爲名說文濯水出汝南吳房入灑水經注同州郡志作濯陽亦誤俗本作濯畢阮已校正吳房杜氏作吳防見昭十三年注防房古通

襄城郡

庠案左氏僖二十四年邗晉應韓杜注應國在襄陽城父縣又昭十九年大城城父杜注城父今襄城城父縣此二城父皆當作父城而僖二十四年之襄陽乃襄城之譌蓋父城兩漢皆屬潁川郡晉分潁川置襄城故父城屬襄城春秋本名城父而漢晉作父城者以漢時沛郡有城父故改爲父城此志沛郡無城父而譙郡有之當卽沛郡分屬者也左僖二十三年遂取焦夷杜注夷一名城父今譙郡城父縣據此則杜預之時譙未爲封國然考晉書譙剛王傳剛王于武帝受禪時卽封譙後亦

無徙封之事。則杜注誤矣。

繁昌疑當從皇甫氏說。屬潁川。見前。魏志稱襄城郡晉置。繁昌晉屬豈西。晉末移屬皇甫氏不及見耶。本書五行志。惠帝永寧元年。齊王冏舉義軍。軍中有小兒出于襄城繁昌縣。亦同魏說。寅案州郡志繁昌本襄城。又屬焉。是魏已屬襄城。皇甫說未可從。

汝陰郡

左氏僖二十三年傳。城頓而還。杜氏注。今汝陰南頓縣。據杜說。此郡之餽陽。當與汝南之南頓互易也。見前。又案州郡志。南頓令漢舊縣。何志故屬汝陽。晉武帝改屬汝南。沈約案晉太康地志。王隱地道無汝陽郡。竊疑汝陽當作汝陰。

梁國

案本書武帝紀。泰始元年。封從叔父斌爲陳王。故杜氏隱三年有陳國陳縣。成十六年有陳國武平縣之注。摩案水經□水注。又東逕鹿邑城。引杜預亦作陳國武平。至咸寧三年。徙斌爲西河王。國除爲郡。故州郡志言項城令太康地志屬陳郡。本書梁王彤傳。咸寧中以陳國汝南南頓增封。蓋割數縣增梁國耳。非謂遂廢陳郡也。若如本志竟刪陳郡。則汝南何以不刪。太康志何以仍有陳郡。後篇但言惠帝分梁置陳。疑非確證。又案杜氏僖十七年注。項國汝陰項縣。蓋陳王斌立國時。項屬汝陰。及太康時還爲陳郡。而項屬陳。或其時始更名項城。

總之此縣。始終不屬梁國也。爾雅。陳有宛丘。郭璞注。今在陳郡陳縣。又州郡志引太康地志。陳令屬梁。無復陽夏縣。又晉地志。惠帝永康中。復立陽夏。本書何曾。謝鯤。袁悅之。袁瓌傳。皆陳國陽夏人。蓋西晉初。陽夏屬陳。太康末。廢惠帝復立也。又案本書陳頴傳。頴陳國苦人。仕爲郡督郵。太守劉享拔爲主簿。據此。則郡督郵實陳郡之督郵也。劉享實陳郡之太守也。頴後劾案沛王韜獄。韜以咸寧元年封。不得謂太康時無陳郡。至惠帝始分置也。又殷浩傳。浩陳郡長平人。王隱傳。隱陳郡陳人。

沛國

汝屬遼東。此當作汝。刊本譌誤也。杜氏隱七年注。滕國在沛國公丘縣東南。本書賈充傳。咸寧三年。更以沛國之公丘益其封。本志公丘屬魯國。未詳孰是。本書武陔傳。陔沛國竹邑人。此作竺邑。似誤。

譙郡

案本書譙剛王遜傳。武帝受禪封世嗣譙國。至東晉末。故杜注左傳。隱二襄元昭六等年。皆作譙國。此作譙郡。誤。杜注亦有作譙郡者。俗本援此改竄也。本書兩夏侯后傳。皆稱沛國譙人。此亦當作譙國。刊本誤沛。

魯郡

本書索靖傳。惠帝卽位之前。爲魯相。考晉初諸王無封魯者。豈相爲太守之誤耶。又案武帝紀。受禪之

始封石苞樂陵郡公。陳騫高平郡公。賈充魯郡公。裴秀鉅鹿郡公。核之本志。樂陵、高平、鉅鹿皆稱國。蓋緣此得名。然獨于魯則稱郡。本志例不合矣。武帝紀。太康五年夏四月。任城魯國池水赤如血。又紀志之不合也。又新蔡王騰傳。有鉅鹿太守。則與索靖傳之魯相例又不合。杜預春秋釋例。隱元年作魯國。番當作蕃。寅案續漢志作蕃。音屏藩之藩。左傳襄四年戰狐台。杜注。魯國番縣。東南有目台亭。陸德明云。番本或作蕃。州郡志亦作蕃云。音皮。漢末太傅陳蕃子逸爲魯相。改蕃爲番。并改音皮也。

弋陽郡

案漢地理志。軼故弦子國。杜氏左傳僖五年注同。水經注亦云。江水東逕軼縣。故城南。故弦國也。是漢晉人皆謂弦國在軼。本志謂在西陽。吳氏卓信漢地理志補注云。地道記以爲在西陽。非也。杜氏通典輿地廣記並主其說。非是。

安豐郡

州郡志云。尋陽本縣名。漢屬廬江。吳立蘄春郡。尋陽縣屬焉。晉武帝太康元年省蘄春郡。以尋陽屬武昌。改蘄春之安豐爲高陵。及邾縣皆屬武昌。安豐下又云縣名。後漢屬廬江。晉武帝立爲安豐郡。水經注引晉書地道記云。安豐、安豐郡之屬縣也。與沈志尋陽下說不合。未詳孰是。又寰宇記云。松滋晉武帝平吳。以荊州有松滋縣。改爲宿松。

冀州

趙國

左傳昭十二年杜注鉅鹿下曲陽縣有肥壘城十五年注鼓聚同。又地形志鄆作鄆云二漢晉屬鉅鹿。案說文邑部鄆在鉅鹿從邑鼻聲蓋鄆爲正體惟不屬趙國耳。

鉅鹿國

案本書武帝紀分封諸王無鉅鹿之號。本書新蔡王騰傳有鉅鹿太守崔曼是爲郡名無疑。互見魯郡下。不當作國。下曲陽鄆當屬此郡見前。又水經注濁漳水篇引闕駟十三州志曰楊氏縣北四十里武亭故縣也。郡國志楊氏屬鉅鹿則晉時此郡下當有楊氏縣。本志缺載。又案本書衛恆傳恆序四體書勢云今鉅鹿宋子有耿球碑。宋子本漢縣據此知西晉縣仍在。本志缺載。

安平國

地形志長樂郡漢信都晉改。又堂陽南宮晉屬安平後屬長樂。信都下博晉屬長樂廣川晉屬廣川後屬長樂。又云武邑郡晉武帝置武邑武遂灌津晉屬安平後屬武邑。阜城晉屬渤海後屬武邑。水經注濁漳水篇衡漳又東逕武邑縣故城北。晉武帝封子於縣以爲王國後分武邑武遂觀津爲武邑郡。治此。本書武帝紀太康五年二月景寅立南宮王子玷爲長樂王。太康十年冬十月壬子徙南宮王承爲武邑王。又牽秀傳秀武邑觀津人。參考兩書晉實有長樂武邑二郡即在太康之後亦當別見。下篇本志絕不載及。

未詳何據。又案洪氏亮吉東晉疆域志引元和郡縣志。晉置武強縣。屬武強郡。并云今考武強郡誤。當從地形志作武邑郡也。蓋晉武置武邑郡。又置武強縣以屬之。今案水經注河水篇。又東北逕長樂郡武疆縣。故城東。長樂故信都。晉太康五年改從今名。則武疆當屬長樂。元和志有脫誤也。

平原國

地形志。高唐二漢晉屬平原。後罷。水經注。潔水篇。杜預曰。祝阿縣西北有高唐城。據此知太康之初。高唐已罷。并祝阿矣。

樂陵國

石苞封樂陵郡公。子孫世爵。至西晉末。見本書本傳。不應再作王國。水經注。河水篇。樂陵縣。伏琛。晏謨言。平原邑。今分爲郡是也。互見魯郡下。

勃海郡

地形志。廣川晉屬廣川。後屬長樂。棗強前漢縣。後漢罷。晉復屬廣川。索盧晉屬廣川。似西晉時曾分立廣川郡。并置索盧縣。而州郡志。廣川太守下。絕不載西晉立此郡。於廣川縣。則云前漢屬信都。後漢屬清河。魏屬勃海。晉還清河。於棗強縣。則云前漢屬清河。後漢晉江左無。魏沈二說互異。本志以廣川縣屬勃海。既不隸廣川長樂。又不屬清河。未詳何據。

章武國

東平舒或作東平野。誤。今正。

河閒國

水經注但有易縣。無易城縣。地形志易縣下云。前漢屬涿。漢晉屬河閒。後屬高陽。亦不書晉改易城。本志豈別有據耶。五行志亦作易城。

高陽國

地形志扶輿前漢屬涿。後漢罷。晉復屬高陽。前漢晉曰樊輿。後罷。案魏志各縣有云。晉縣後罷者。本志或存或否。又未詳斷於何年。後人讀此無可依據。姑志于此。以俟博學。又地形志樂鄉前漢縣。後漢罷。晉復屬高陽。志皆不載。

博陵國

續漢郡國志無博陵國。水經注滌水篇云。漢質帝本初元年。追尊父翼陵曰博陵。因以爲縣。又置郡焉。漢末罷還安平。晉太始復爲郡。本志但言漢置。不載已廢復立。似有遺脫。西晉無博陵王。惟王浚嗣父沈爵爲博陵郡公。蓋公國也。寅案汲古閣本。作博陵郡。不作博陵國。此據殿本。汲古閣本已校正。

清河國

郡國志作貝邱。前漢宋魏志水經注同。劭應以此縣爲卽左氏齊襄公田於貝邱故地。見地理志注。水經注河水篇或本作貝邱者誤。

中山國

劉逵魏都賦注。眞定屬中山郡。故安屬范陽。今見屬中山郡。杜氏釋例。北嶽中山曲陽縣西北恆山也。本志盡屬他郡。不詳所據。

常山郡

據杜說。則恆山在中山曲陽。而郭璞注爾雅。北嶽說與本志同。豈太康以後割隸耶。

幽州

范陽國

故安。據劉逵注三都賦。當屬中山。見前。地形志故安作固安。寅案郡國志是也。地形志。蓑鄉晉屬范陽。此長鄉疑當作蓑鄉。

燕國

安國當作安樂。水經注沽水篇云。沽水又南逕安樂縣故城東。晉書地道記云。晉封劉禪爲侯國。此刊本之譌。互見荊州上庸郡。寅案汲古本亦作安樂。云國相蜀主劉禪封此縣公。是本不作安國也。此據殿本。未校正。

北平郡

地形志幽州漁陽郡下無終、土垠、徐無三縣注。皆言晉屬右北平郡。杜預釋例言北平無終無右字。未詳魏志何本。庠案本志北平無右字而上篇乃云秦滅燕以爲漁陽上谷右北平遼西遼東五郡兩漢皆有右北平郡而北平二字則中山國之縣名本志北平郡下既云秦置則當有右字爲是。

平州

本書武帝紀太康三年八月罷平州、寧州。本志但紀寧州不紀平州。又後篇云平州初置。慕容廆爲刺史。考之武帝紀及慕容氏載紀咸寧二年立州之後。至太康三年州罷。其時虜方寇掠昌黎肥如。至太康十年始降。是平州復立必在十年以後。紀志不相謀合。當有缺誤也。

昌黎郡

地形志營州昌黎郡。晉分遼東置。此云魏置。不詳孰是。

遼東國

山海經海內東經潦水下郭璞注。潦陽縣屬潦水。案潦疑通作遼。地理志遼東郡有遼陽縣也。寅案說文大兒其遼東字作遼。山海經作潦者。古文假借。郭注不改字。非晉有潦陽縣也。郡國志遼陽屬元菟郡。本志並闕。增紀於此。

樂浪郡

水經注沮水篇引闕駟十三州志曰。沮水縣在樂浪東北。鏤方縣在郡東。今志無沮水縣。豈水經注有誤。

耶郡國志亦有涇水縣。寅案說文涇水出樂涇。樂方東入海。从水貝聲。一曰出貝水縣。地理志同。水經注引關駟志當不誤。本志闕此縣。未詳何時省并也。郡國志涇水作涇水。非是。

帶方郡

三國魏志東夷傳。建安中公孫康分屯有縣以南荒地爲帶方郡。本志作公孫度疑誤。

并州

太原國

左傳昭二年。執陳無字於中都。漢以爲縣。別無徙治之文。乃杜預注謂界休縣南中都城是。不言今中都縣屬太原。是西晉縣并入界休矣。本書孫楚孫盛傳。太原中都人。似晉初其縣尙存。未詳孰是。爾雅燕有昭余祁。郭璞注今太原鄠陵縣。本志缺陵字。

上黨郡

地形志。猗氏晉屬上黨。本志屬河東。又郭璞注山海經。汾水或言出穀遠縣。郡國志穀遠亦屬上黨。又泫氏地形志作玄氏。注云晉屬上黨。又地形志鄉縣晉屬上黨。疑卽武鄉。有脫字也。

西河國

文選雪賦注引張華博物志曰。西河郡鴻門縣有火井祠。火從地出。案鴻門前漢屬西河郡。國志無。疑晉復置也。介休。杜注左氏傳或作界休。亦作介休。蓋古通。郡國志注引古今注曰。建武十一年十月西

河上郡屬魏郭璞注山海經西山經鹿臺之山云今在上郡本志無上郡增紀于此

樂平郡

水經注清漳水篇。轅水出轅河縣西北轅山。南流逕轅河縣故城西南。地形志作遼陽。又壽陽地形志作受陽。注晉屬樂平。本書武帝紀。樂平王延祚以太康元年八月己未封。事在平吳凱旋後三月。則此郡當作國。

雁門郡

北史魏穆帝紀云。晉懷帝進帝大單于。封代公。帝以封邑去國遠。從劉琨求句注陁北地。琨大喜。乃徙馬邑。陰館樓煩繁峙崞五縣人於陁南。庠案本志上篇序云。黃初元年復置并州。自陁嶺以北并棄之。晉因以前非晉有也。更立城邑盡獻其地。據此知西晉中年五縣俱在。本志刪陰館樓煩二縣未詳。又水經注汾水篇引十三州志曰。出武州之燕京山。亦管涔之異名也。武州漢縣屬雁門郡。闕志無。故縣字疑晉時尙存。又州郡志云。陰館前漢作陰觀。後漢晉作陰館。水經注濕水篇引十三州志。劇陽在陰館縣東北一百三里。又十三州志。善無縣南七十五里有中陵縣。水經注河水篇。善無縣故城。十三州志云。舊定襄郡治也。又引十三州志云。武縣在善無西百五十里。又濕水篇引十三州志曰。班氏縣在郡西南百里。班氏縣在高柳南百里。寅案郡國志班氏班氏高柳三縣皆屬代郡。惟陰館樓煩武州劇陽四縣屬雁門郡。又善無中陵二縣皆屬定襄。云故屬雁門。闕志皆不言。故縣疑晉尙存未詳何。

時書并改屬本志
俱刪恐有缺誤。

新興郡

地形志永安郡下云。後漢建安中置新興郡。郡國志注引魏志云。建安二十年。省雲中。定襄。五原。朔方。置一縣。領其民。合以爲新興郡。此作魏置。未詳。

雍州

京兆郡

地形志杜。二漢晉屬京兆。二漢曰杜陵。晉曰杜城。後改州。郡志杜令。二漢曰杜陵。魏改。兩志雖異。然西晉不當稱杜陵也。本書忠義王育傳。有杜令王攸。左傳襄二十四年注作京兆。杜當從沈說。本書杜預傳云。預京兆杜陵人。誤。沿漢代舊名也。又州郡志。池陽令。晉太康地志屬京兆。本志屬扶風。未詳孰是。

馮翊郡

續漢志馮翊雲陽下。劉昭注。有荆山。引帝王世紀曰。荆山在馮翊懷德之南。帝王世紀。皇甫謐著。是其時當有懷德志缺。

扶風郡

州郡志。郿縣令。晉太康地志屬秦國。案本書武帝紀。秦王東以太康十年徙封。本志後篇。以爲惠帝更扶

風爲秦國。未詳何據。池陽。當屬京兆。見前。又案太康地志。既有秦國。應斷於太康之末。此志有秦。寧二州。則應斷於太康之初。今考扶風。王駿以咸寧三年徙封。太康七年薨。子暢嗣。十年徙。始改國名。秦是。此志既不從太康地志作秦國。亦應稱扶風國。郡字誤也。

安定郡

烏氏。或本作烏氏。誤。地理志注師古曰。氏音支。本書張軌傳。軌安定烏氏人。是也。

北地郡

郡國志。北地郡有弋居縣。地形志云。弋居。晉罷。後復。本書索靖傳。子綝。以首迎大駕功。封弋居伯。是。西晉此縣仍在。本志前後篇俱不載。疑缺。又本書傅元傳。弟祗。封靈川縣公。考晉無靈川縣。惟郡國志。北地郡屬有靈州縣。祗又爲北地人。則靈州之誤無疑矣。此郡下亦不載。未詳。

始平郡

案兩漢志。別無蒯城縣。魏宋志亦不載。當是晉始置縣。旋即并省。然命名之義。殊不可解。惟說文邑部。扶風。鄠有鄠鄉。豈蒯城卽鄠城。因字相近而誤耶。錄此備考。史記傅靳蒯成列傳。蒯成侯。繆者。索隱。蒯者。鄉名。案三蒼云。蒯。鄉在城父縣。音裴。漢書作鄠。從崩。从邑。今書本並作蒯。音菅。蒯之蒯。非也。蘇林音薄。催反。晉灼案功臣表。屬長沙。崔浩音薄。壞反。楚漢春秋作憑成侯。則裴憑聲相近。此得其實也。又正義引括

地志云。蒯亭在河南西十四里。苑中輿地志云。蒯成縣。故陳倉縣之故鄉聚名也。周繆所封也。晉武帝咸寧四年。分陳倉立蒯成縣。屬始平郡也。綜考索隱諸說。是其首當从邑崩聲爲正。史記正義引括地志作蒯亭。輿地志作蒯成。晉志作蒯城。並誤。

新平郡

關中無汾水。未詳汾邑何所取義。方輿紀要。柤邑。漢置。晉仍爲柤邑縣。屬新平郡。疑原本作柤邑。顧氏猶及見之。後譌爲汾邑耳。寅案柤與幽古相通借字。亦作那。又誤作汾也。

涼州

金城郡

地形志。河州金城郡有大夏縣。注云。二漢屬隴西。晉屬晉興。不言中廢復置。水經注。河水篇。大夏水又東逕大夏縣。故城南。晉書地道記曰。縣有禹廟。案後篇。張氏分置晉興郡。統大夏縣。援據魏鄴兩書。此縣自漢至晉不改。是未立晉興以前。或屬金城。或屬隴西。中篇不應刪去。又水經注。闕駟曰。白石縣在狄道西北二百八十五里。又後篇。張實分金城之令居。枝陽二縣。又立永登縣爲廣武郡。是令居。枝陽皆仍漢縣之舊。又漢允吾縣屬金城郡。闕駟曰。允吾縣西四十里。有小晉興城。疑晉亦仍漢舊。均不當刪。又案河西諸郡。至惠帝以後。張氏。苻氏。呂氏。沮渠氏。迭爲雄長。更增郡縣。故本書載記所紀諸地名。往往

不見此篇未可據以論難。今就可考者錄之左方。疑者缺焉。

西平郡

庠案志以西平郡爲漢置非也。

水經注河水篇。一水逕長寧亭南。東入長寧水。又牛心川水。北逕西平亭西。東北入湟水。魏黃初中立西平郡。闕駟亦言長寧亭北有養女嶺。西平亭北有土樓神祠。是爲二亭名。晉時並未立縣。此作西都。長寧二縣未詳何據。庠案闕駟言見水經河水篇。又東過金城允吾縣北下。

武威郡

說詳金城下。

張掖郡

本書武帝紀。泰始三年四月。張掖太守焦勝上言。氐池縣。大柳谷。兩漢皆有氐池。屬張掖郡。有元石一所。呂光載記。有張掖屬縣邱池。令尹興。豈十六國時改邱池爲邱池耶。說詳金城下。又本書儒林傳。崔遊爲文帝相府舍人。出爲氐池長。

西郡

庠案兩漢均無西郡。而志以爲漢置非也。

說詳金城下。

酒泉郡

說詳金城下。

敦煌郡

案後篇言惠帝元康五年分敦煌郡五縣。酒泉之沙頭縣。又別立會稽新鄉。凡八縣。爲晉昌郡。則新鄉爲元康時立。不應先見中篇。

秦州

隴西郡

續漢郡國志。隴西郡有枹罕縣。本書五行志。永嘉五年。枹罕令嚴根妓產一龍一女一鵝。州郡志。河關令。太康地志。屬隴西。又郡國志。隴西有安故縣。闕駟十三州志。縣在郡南四十七里。疑西晉時尙有此縣。本書藝術。王嘉傳。嘉。隴西安陽人。志缺。又案本書。高密文獻。王泰傳。泰以武帝受禪。封隴西王。至惠帝時始改高密。武帝本紀。則於泰始元年封泰隴西。至惠帝元康九年六月。又言太尉隴西王泰薨。雖與本紀稍異。然太康之初。則隴西爲王國無疑。此作郡。誤也。

南安郡

庠案兩漢有南安縣屬犍爲郡而無南安郡本志南安郡下注云漢置非也

天水郡

州郡志天水太守下新令晉太康地志有

武都郡

州郡志武都郡上祿令漢舊縣後省晉武帝太康三年又立又案常璩華陽國志武都郡蜀平屬雍州太康六年還梁州校本志前篇太康三年罷秦州并雍州故常璩以爲武都暫屬秦州未幾卽屬雍故直言屬雍州及七年秦州復立而武都前一年已歸梁故不言及秦州本志仍隸秦部未詳又華陽國志武都郡下有泉街平樂修武嘉陵上祿五縣今皆不載未詳

陰平郡

州郡志北陰平太守平武令蜀立曰廣武晉武帝太康元年更名此作平廣字之誤也華陽國志亦作平武又有甸氏剛氏二縣庠案甸氏剛氏兩漢皆屬廣漢

梁州

漢中郡

案元和志黃金縣本漢安陽縣地後魏文帝於此分置黃金縣水經注但有黃金戍元和志蓋本酈說據

此則縣不當始立於晉。又地形志興勢延昌三年置。元和志興道縣下云。後魏宣武帝分置興勢縣。貞觀二十三年。改為興道縣。竊謂黃金興勢在三國時僅為屯戍之地。置縣之說。惟見於此。本志與魏酈不合。未詳何據。至興道實以唐初避世字嫌名而改。不特非晉縣。亦非魏周縣也。又案華陽國志漢中但六縣。無黃金興道。本志似誤。寅案隋志漢川郡有興勢。黃金二縣。唐志興勢作興道。是隋未尚未改興道也。又後魏為曹魏尤闕疏謬。

梓潼郡

後篇言桓温置晉昌郡。又於晉壽置劍閣縣。是劍閣為東晉所置。不應前後複見。華陽國志云。有劍閣道。三十里至險。有關尉。據此。知西晉為地名。並未立縣也。又州郡志涪令下並無晉改涪城之條。不詳何據。華陽國志亦作涪。寅案隋志涪城西魏所改。晉不當有城字。又寰宇記。晉於梓潼水尾萬安故城置萬安縣。晉末亂。移就

屏亭。是本志黃安即萬安。字相近而誤也。黃安。西魏所置。見隋志。不得列為晉縣。寅案隋志萬安舊曰屏亭。晉置始不足據。又隋志黃安舊曰屏亭。西魏改。今晉志有黃安。誤也。又案州郡志。邵歡令永初郡國。何徐並有不注置立。疑自蜀立。曰

昭歡。晉改也。據沈說。此縣避諱更名。必自西晉。本志缺載。惟後篇孝武分立晉壽郡。統邵歡。不言置自何

代。未詳。又州郡志。萬安令下。又言二漢。晉無寰宇記不詳何據。

廣漢郡

廣漢郡

州郡志新都令漢舊縣晉武帝爲王國太康六年省爲縣屬廣漢

新都郡

什方當從郡國志州郡志作什邡又州郡志廣漢太守下有郫縣令漢舊縣陽泉令蜀分綿竹立皆不言晉省本志缺未詳又本書王長文傳長文廣漢人此兩郡俱缺未詳又諸王傳有新都王太康四年薨則此當作國寅案武帝紀咸寧三年立皇子該爲新都王太康四年新都王該薨武十三王傳亦惟咸寧三年前當稱郡耳州郡志云太康六年省爲縣豈國除之後復改爲郡至六年始省并廣漢耶或沈志誤也

涪陵郡

劉逵蜀都賦注涪陵丹興二縣出丹砂案洪氏亮吉東晉疆域志蜀置涪陵郡本理丹興太平寰宇記稱晉太康地記云省丹興縣郡移理漢復本志無丹興蓋從太康地記說也華陽國志云丹興蜀時省又有漢髮縣屬涪陵郡疑卽漢復也寅案本志漢葭卽華陽志之漢髮建安中葭縣也葭與髮形近而譌又華陽志以涪陵爲郡治與寰宇記引太康志異

巴郡

州郡志南宕渠太守下宕渠令二漢晉太康地志屬巴郡寅案二漢志宕渠屬巴郡本志屬巴西郡畢沅輯太康志有巴西巴東二郡無巴郡疑輯本有

脫誤州郡志巴郡下所領四縣與本志同

巴西郡

州郡志有宣漢令。不言置立。水經注江水篇云。巴水出晉昌郡。宣漢縣。郡隸梁州。晉太康中立。案後篇言晉昌郡。爲桓溫立。然惠帝時已分巴西置宕渠郡。統宕渠、漢昌、宣漢三縣。是晉昌郡雖未必爲太康時置。而宣漢縣則立於惠帝之前。屬巴西郡無疑矣。前後不符。不詳何解。寅案郡國志。宣漢。劉昭注引巴漢記曰。和帝分宕渠之東置。又漢昌。永元中置。劉昭注引巴記曰。分宕渠之北而置之。是漢昌、宣漢。續志同屬巴郡。州郡志。南宕渠太守下有宣漢令。云前漢無。後漢屬巴郡。晉太康地志無。據水經注及本志後篇。則宣漢縣太康中尙存。惠帝時改屬宕渠。地志未省。并沈志云。太康志無。非也。本志不載。疑有缺誤。此漢舊縣。亦非晉立。又案蒼溪。岐。愜二縣。漢志無。沈志常志俱不載。未詳何時置立。今攷隋志云。巴西郡蒼溪。舊曰漢昌。開皇未改名焉。關入晉置。可云。眞絕。又隋志亦無岐。愜。疑卽岐。坪縣。舊名。唐書地理志。蒼溪。岐。坪。皆屬閬州。不聞晉有岐。愜縣也。

巴東郡

洪氏亮吉。東晉疆域志。巴東郡。漢豐縣下云。太平寰宇記。建安二十一年。蜀漢先主分胸臆縣西北界立。以漢上豐盛爲名。沈志稱。何志不注置立。太康地志。巴東有漢昌縣。疑是。今考漢昌屬巴西郡。太康地志所云漢昌。當屬漢豐之誤。據此。則西晉卽有漢豐。晉地理志失載也。又劉逵蜀都賦注。鹽池出巴東北新井縣。互見荊州。又華陽國志。巴東郡有漢豐縣。建安二十一年置。洪說是也。

益州

蜀郡

水經注江水篇。晉太康中。以蜀郡爲王國。更名成都。內史。庠案成都王穎受封。在太康十年。見武帝紀。穎傳亦言太康未受封。以前似未聞有封於蜀者。

鄭注太康中當作太康末。翊寅謹案州郡志亦言晉武帝太康中改曰成都郡。從復舊。本志曰蜀郡是據太康初年未改以前也。

漢嘉郡

水經注沫水篇。青衣水又東逕開邦縣。故平鄉也。晉初置。寅案開邦常璩華陽志作開邦。

朱提郡

華陽國志南廣郡。蜀延熙中置。建武九年省。建武為惠帝年號。是終武帝之世。南廣置郡如故。本志不載。未詳。又案常志南廣郡屬縣四。南廣、臨利、常遷、新興。志缺其三。亦不可解。州郡志南廣太守。晉武帝分朱提立本書王遜傳。遜於惠帝時分立南廣郡。未詳孰是。總之晉志不當全刪也。岸案惠帝無建武年次。年即改大興。華陽國志建武九年當是元年之誤。又南廣疑武帝時省。并王遜於惠帝時復立。至建武又省也。然無明證。翊寅案州郡志南廣令晉太康地志屬朱提。是武帝太康中無南廣郡之證。州郡志又言晉武帝分朱提立。疑武帝乃惠帝之譌。

越嶲郡

水經注沫水篇。靈道縣一名靈關道。晉太始九年。黃龍二見於慈池縣。令董元之率吏民觀之。以白刺史王濬。濬表上之。晉朝改護龍縣也。本志缺載。又州郡志蘇利。漢曰蘇示。原缺一字。曰蘇利。本志既無蘇利。又缺蘇示。似應補。岸案漢書地理志越嶲郡有蘇那。疑即蘇示之譌。寅案郡國志作蘇示。古郡示字同聲相借。據州郡志疑後漢稱蘇示。晉始改蘇利也。

牂柯郡

州郡志。且蘭令。漢舊縣。晉太康地志無。劉昭注郡國志。故且蘭縣下。引地道記曰。有沈水。本志蓋從地道記也。又州郡志。廣談長。晉太康地志屬牂柯。毋劍。當作毋歛。指談當作談指。寅案郡國志作毋歛。州志有故毋歛。令云漢

舊縣。此作劍。誤。又郡國志。談指出丹。州郡志。夜郎有談。柏令云漢舊縣。屬牂柯。蓋即談指之譌。

寧州

庠案南監本晉地理志於益州後段直接寧州不提行非是。

興古郡

州郡志。西隋令。漢舊縣。屬牂柯。晉太康地志屬興古。並作隨。華陽國志。西隨縣。屬梁水郡。蓋梁水郡為刺史王遜分置。以縣割屬。初隸興古也。劉昭注。郡國志。引地道記。西隨縣有麋水。寅案本志無。西隨當據補。州郡志。都督作都唐。寅案州郡志。西平太守都陽令。何志。晉成帝立。沈約案。晉起居注。太康二年置興古之都唐縣。疑是據此。則沈志作都陽。晉起居注作都唐也。

建寧郡

州郡志。建寧太守下有同樂令。晉武帝立。本書五行志。孝武太元十四年。建寧郡銅樂縣枯樹斷折。忽然自立相屬。案華陽國志。晉寧郡本益州也。漢開為郡。治滇池。蜀建興三年。丞相亮南征。以郡民李恢為太守。改曰建寧。治味縣。後太守李暹恢孫也。與前太守董懂。建寧鬯量共叛。寧州刺史王遜表改為晉寧郡。屬縣七。滇池。同勞。同安。連然。建伶。毋單。秦臧。建寧郡屬縣十三。味。牧麻。同樂。穀昌。同瀨。雙柏。存。颯。昆澤。

灑江談稟冷邱修雲新定。太安二年分爲益州、平樂二郡。合縣十三云云。據此則常志所云晉寧、建寧二郡建置與本志不同。太安二年所分之益州郡乃在建寧十三縣之內。于晉寧七縣無涉。

永昌郡

南涪華陽國志作南里。寅案李委本、廖寅本華陽國志皆作南涪。

青州

齊國

州郡志。般陽令。晉太康地志屬齊。地形志。盤陽。晉屬齊郡。又地形志。下密、都昌、平壽、膠東四縣。晉屬齊郡。後屬北海州郡志。北海太守下有都昌、平壽二縣。又有膠東、下密二縣。引太康地志云。屬北海。疑晉初屬齊。太康時移屬北海。本志列三縣于濟南。不載北海郡。又不載都昌縣。疑誤。說互見下。又案曹魏于齊郡下置新沓縣。本書山濤傳。封新沓伯。終于太康四年。是新沓爲伯國。不應刪。

濟南郡

平壽、下密、膠東見前。州郡志。卽墨令。太康地志屬北海。寅案地形志。卽墨。後漢屬北海。晉屬長廣。本志屬濟南。未詳孰是。祝阿。太康地志無。左氏傳。杜注。襄十九年。有濟南祝阿。蓋太康末省。又杜注。桓十八年。有濟南歷城。莊十年。有濟南平陵。襄二十七年。有濟南東朝陽。昭十年。有濟南於陵。哀十年。有濟南隰陰。本志惟列東朝陽于樂安國。餘

俱不載。又案卽墨。以上四縣。皆在臨淄。以東祝阿一縣。乃在齊西三百里。古人置郡。領縣。地境相連。不應竟絕曠遠至此。又案地形志。歷城。著晉皆屬濟南。平陵。晉屬濟南。曰東平陵。寅案州郡志。濟南有廣城縣。廣城卽歷城之譌。平陵。漢晉并曰東平陵。又見郡國志。本志俱缺。非是。本書儒林劉兆傳。兆。濟南東平人。卽此傳脫陵字耳。又樂史稱太康地志云。濟南郡管縣。管叔後。又封於此。又樂史稱鄒平。自漢至晉不改。永嘉亂始廢。本書解系傳。系。濟南著人。是本志於濟南應屬之縣。反皆不載。又刪去北海郡。以所屬縣移列濟南。疏舛殊甚。又案宋書五行志。西晉有北海郡。晉書諸王傳。太康元年。以齊王攸子實。繼廣漢。後改封北海王。是不特西晉有北海郡。并改爲王國也。改武帝紀。太康元年十二月戊辰。廣漢王贊薨。始以實嗣王。北海必在太康二三年間。正本志中。篇應列年分。若謂志所列在太康元年。平吳時。則贊方王廣漢。何以不國。傳杜注。北海都昌在莊元年。北海平壽在襄四年。北海卽墨在襄六年。本書隱逸石垣傳。垣自云北海劇人。郭璞爾雅注。今北海劇縣。州郡志引太康志。則以劇屬琅邪。總之不應刪去北海也。

樂安國

前漢地理志。有利縣屬齊郡。益縣屬北海郡。郡國志。二縣皆屬樂安國。水經注。濟水又東北逕利縣西。水經注。巨洋水又東北逕益縣故城東。是兩漢時。利益實二縣名。本志并爲一。不詳改置。豈誤刊耶。若作二縣。則前注當云。統縣九。又據杜注。東朝陽當屬濟南州郡志。引太康志。則云屬樂安。又州郡志。菴令。前漢屬琅邪。後漢屬泰山。晉太康地志。屬樂安。案菴地理。郡國志。均無此縣。或疑爲益爲蓋。形相近而誤。

然所屬郡名與兩志異恐尚有誤字蓋縣地境太遠益縣爲近是寅案地理郡國二志蓋縣並屬泰山不屬琅邪益縣前漢屬北海後漢屬樂安州郡志所列卷令不詳何地未可附會本書樂安平王鑒傳咸寧初以齊之梁鄒益封乃本志此國屬縣有鄒無梁鄒豫

州魯郡下又重出鄒縣是知樂安屬縣必因漢舊名梁鄒無疑其故城爲今濟南府鄒平縣治距樂安最

近鄒縣故城在今兗州府鄒縣東中隔泰安一府一字之誤繆及千里矣顧亭林亦疑鄒字上有缺文寅案

州郡志樂安漢高立名千乘和帝永元七年更名郡國志有千乘樂安二縣沈志有千乘無樂安晉不當二縣俱省也

城陽郡寅案本志城陽郡漢置屬北海自魏至晉分北海而立焉則當先列北海郡領平壽都昌卽墨下密膠東等縣矣

州郡志夷安營陵朱虛引太康地志屬城陽營陵朱虛互見徐州琅琊國地形志夷安晉屬城陽後屬高

密本志均不載而於後篇言惠帝分城陽之十一縣置高密國內又有營陵安邱大劇臨胸等縣是惠帝

以前諸縣俱屬城陽可知乃分營陵朱虛劇安邱臨胸五縣屬東莞疑有脫誤互見徐州東莞郡又後

篇大劇若爲一縣則只十縣若分劇爲一縣則大字斷非縣名疑刊本有誤附紀於此寅案大疑蓋字之

郡分六縣東莞郡分五縣也後篤平昌下疑脫東莞之三沿革圖馬氏曰左隱元年注城陽莊武縣今志作壯武寅案郡國志亦作壯武疑今本左氏

傳杜注誤

東萊國

郡國志郡屬有東牟縣本書懷帝紀永嘉元年有東牟太守龐伉本志郡既不載縣復移置秦山下誤矣

互見泰山郡。本書蘇峻傳。峻長廣掖人。案掖為東萊國治。不當移屬長廣。恐傳誤也。寅案長廣郡有縣

地志同。蘇峻傳長廣掖人掖即擬之譌字。非東萊之掖縣。

徐州

下邳國

州郡志。北陵令。本屬南下邳。二漢無。晉太康地志。屬下邳。本名陵。而廣陵舊有陵縣。晉武帝太康二年。以

下邳之陵縣。非舊土而同名。改為北陵。據此。則下邳之陵。當作北陵。廣陵或當另有陵縣。互見廣陵。寅案

本陵縣作浚郡。國志。廣陵有浚縣。下邳無。本志。廣陵無浚縣。下邳有。當从州郡志為正。

琅邪國

地形志。營陵。朱虛。晉屬琅邪。據州郡志。引太康地志。則屬城陽。今志兩縣俱屬東莞。未詳所本。蒙陰。見

東莞。馬氏曰。左哀七年注。今琅邪鄆縣。今志作緡。

東莞郡

杜注。隱元年。左氏傳。有東莞。劇縣。莊元年。有東莞。臨胸。襄十八年。有東莞。蓋與本志同。乃本志青州。後篇

又盡屬城陽。又與太康地志。地形志各異。不詳孰是。又左傳。莊九年注。有東莞。蒙陰。此屬琅邪。又復不

同。尤不可解。又州郡志。東莞太守。晉武帝太始元年。分琅邪立。咸寧三年。復以合琅邪。太康十年。復立。

本志既先列東莞郡。後篇又言太康十年分屬四縣。與沈志又異。然咸寧三年。既并入琅邪。則杜預以太康五年薨。預存時不應仍有東莞。恐沈志誤也。寅案本志言太康元年分琅邪置東莞與沈志異。疑沈志太康十年爲元年之謬。本督孝友王哀傳。哀城陽營陵人。此屬東莞。未詳。互見琅邪城陽下。

廣陵郡

杜注哀十二年傳。有廣陵、海陵。本志作海陽。字之誤。州郡志。海陵三國時廢。晉太康元年復立。又州郡志。廣陵太守高郵令。漢舊縣。三國時廢。晉太康元年復立。今高郵屬臨淮。與沈志異。寅案廣陵江都高郵廣陵不容太康中獨屬臨淮本志恐誤。又郡國志。廣陵有凌縣。太康地志言廣陵有陵縣。見下邳下。又案郡國志。廣陵下有堂邑縣。後篇言惠帝元康七年。以堂邑置堂邑郡。則未置郡以前。縣仍漢舊可知矣。冊府元龜令長部。晉范廣爲堂邑令。志脫。

臨淮郡

此郡地轄淮水左右。以今輿地言之。各縣皆濱洪澤湖。惟高郵一縣最遠。地勢不合。當屬廣陵。見廣陵下。又案荀顛傳。封臨淮公。若從高平。鉅鹿。例當稱國。又顛於咸熙初。封臨淮侯。武帝踐阼。進爵爲公。是在魏末。晉初已有臨淮郡。乃本志前篇云。太康元年。分置臨淮郡。與傳矛盾。必有一誤。

荊州

江夏郡

本志揚州宣城郡春穀縣注。言孝武改春爲陽。案孝武以母鄭太后名春。凡縣名春者皆改。弋陽郡之蘄春。江夏郡之平春。安成郡之宜春。淮南郡之壽春。吳郡之富春等縣。悉改春爲陽。散見州郡志。元和志。寰宇記中。汝南之北宜春。東晉省。似不應獨注春穀一縣下。又州郡志引太康地志。平春。鄆二縣。皆屬義陽郡。本書李重。張光傳。皆江夏鍾武人。案鍾武。漢縣。後漢廢。蓋西晉復立。本志闕。漢案州郡志。鍾武前康地志無不詳何時復立。

南郡

州郡志。南郡太守秦立。漢文帝元年爲臨江國。景帝中元年復故。晉武帝太康元年。改曰新郡。尋復故。本志但云漢置。似有缺。又州郡志。監利侯相。沈約案晉起居注。太康四年復立南郡之監利縣。尋復省之。言由先有而被省也。疑是吳所立。又是吳所省。今攷本志。秦寧二州。皆太康三年罷。秦州雖七年復置。其中篇既列二州。則以三年爲斷。不當於此列監利縣也。又杜注。左傳桓十年。有南郡華容。續漢志。汝南城父縣。有章華臺。注引杜預曰。章華宮在華容縣城內。州郡志。華容。晉太康元年省。後復立。水經注。江水又東。逕公安縣北。注云。杜預克定江南。罷華容置之。謂之江安縣。南郡治矣。以華容之南鄉爲南郡。晉太康元年。改曰南平。據沈鄴說。則有江安。便無華容。今以華容屬南郡。雖江安屬南平。同時並存。不詳。

何據。又案路史國名紀云。預云。華容今監利也。據此。則左傳桓十年杜注。華容下。疑宋本有此六字。蓋預以華容并監利。後又分置江安。故云然。

襄陽郡

洪氏亮吉東晉疆域志云。案晉書地理志。義陽郡有鄧縣。襄陽郡復有鄧城縣。疑誤。今攷杜氏左傳釋例。鄧國義陽鄧縣。鄧在鄧縣南。本志中篇略紀太康郡縣。適當杜預作鎮襄陽時。豈有現存鄧縣。不列於注。反云在鄧縣南之理。至鄧與鄧城二縣重出。洪氏已辯其非。無可回護。若圖經云。晉置鄧縣。則由晉志而誤也。寅案郡國志。鄧有鄧聚。桓九年。左傳鄧南鄧人。杜注。鄧在鄧縣南。沔水之北。一統志。襄陽縣東北二十里有鄧城。鄧城在鄧城南八里。又案鄧縣今南陽府鄧州。晉太康中。鄧屬義陽。則鄧城與鄧皆非晉縣也。又僖二十四年。邗。晉。應。韓。杜注。應國在襄陽父城縣西。父城。或作城父。江氏永。春秋地理攷實。更正。然攷父城在今汝州寶豐縣魯山界。距襄陽殊遠。似當近屬南陽。恐襄陽為南陽之誤。本志兩郡俱無此縣。又不可解。又前篇水經注沔水篇。建安十三年。魏武平荊州。分南郡。立為襄陽郡。建安為漢獻帝年號。當云漢置也。又水經注沔水篇。晉武平吳。割臨沮之北鄉。中廬之南鄉。立上黃縣治。幹鄉不言所屬。州郡志言二漢。晉無上黃。疑水經注別有所本。寅案州郡志。上黃。本屬襄陽。與鄧注合。志缺。

南陽國

堵陽州郡志。作赭陽。寅案。郡國志有堵陽。無赭陽。本志不誤。又郭璞山海經注。今湍水出南陽穰縣。本志。穰屬義陽州。郡

志。穰、漢舊縣。屬南陽。不言晉徙。屬義陽。郭說是也。寅案：郡國志：穰屬南陽州。郡志屬新野。云晉惠帝分南陽立。則未分以前。晉亦屬南陽矣。

順陽郡

杜注。左氏傳桓七年。有筑陽。僖二十五年。有丹水析。昭十九年。有陰。皆云南陽屬縣。今作順陽。則從後改郡名也。然攷州郡志。汎陽令晉太康五年立。屬南鄉。仍屬順陽。仍字疑後字之誤。據此。知太康五年以前。皆名南鄉郡也。本志不載汎陽。誤。又案。武帝紀。太康十年。封扶風王子暢爲順陽王。疑南鄉之改順陽。當在是年。則當作順陽國。本書良吏范晔傳。晔。南陽順陽人。豈順陽未立國時。縣屬南陽。不屬南鄉耶。未詳。寅案：郡國志。順陽屬南陽郡。又州郡志云。魏分南陽立南鄉。晉武帝更名順陽。本志言順陽。太康中置。則太康五年以前。志例當作南鄉郡也。

義陽郡

武帝紀。義陽王望傳。泰始二年。封從伯父望爲義陽王。望卒。孫奇嗣。太康九年。奇貶。更徙封章武王威爲義陽王。是太康以前。義陽爲王國。不當作郡。又州郡志。隨陽太守。晉武帝分南陽義陽立義陽國。太康年。又分義陽爲隨國。屬荊州。隨縣。晉太康地志。屬義陽。後隨國與縣俱改。本志後篇。言惠帝分義陽爲隨郡。與沈志異。元和志亦言。太康九年。分義陽置隨郡。本書隨穆王傳。武帝以義陽國一縣。追封爲隨縣王。子邁嗣。太康九年。以義陽之平林。益邁爲隨郡王。水經注。潁水篇。東南逕隨縣西。注亦言。太康中立爲郡。然則。謂惠帝始分。誤也。互見序首。又州郡志。有厥西縣。平氏縣。今作厥縣。西平氏縣。刊本譌。水經注作

潑西杜注莊四年作厥縣亦傳寫譌脫寅案郡國志平氏桐柏大復山淮水出漢肥南陽本志云桐柏山
誤字之

新城郡

州郡志房陵太康地志王隱無疑太康時省又案郭璞注山海經新城汴陰縣亦有漳水汴疑當作汴
本志無汴陰有汴陰

魏興郡

晉興當作興晉見州郡志又州郡志鄖鄉令下云本錫縣魏晉世爲郡後省武帝太康五年改爲鄖鄉
又州郡志錫縣令前漢長利縣後漢省太康四年復立五年改長利爲錫據此則魏晉之際至太康三年
有錫無長利五年以後有錫有鄖鄉無長利其二縣俱存僅太康四年長利復立之時不過一歲以秦寧
二州年分例之不容竝載又州郡志洵陽作旬陽前漢有後漢無晉太康四年復立與秦寧二州年分斷
例亦不合說見南郡監利又案漢書地理志漢中郡有錫縣又宏農郡上雒下注又有甲水出秦領山
東南至錫入沔應劭師古皆注錫音陽卽春秋所謂錫穴後譌爲錫非也寅案錫班志作錫應郡顏師古
沔陽有鐵錫有錫則作錫者蓋本續漢志也說文錫馬頭
飾也臣鉉等曰錫今經典作錫與章切應顏說恐非是

上庸郡

安富華陽國志同州郡志作富安寅案汲古本州郡志亦作安富云晉太康地志永初郡國何徐並有又州郡志武陵令前漢屬漢中後漢晉太康地志王隱並無疑後漢省至太康後始復立也又華陽國志上庸郡有安樂縣咸熙元年爲公國封劉後主也本志從水經注晉書地道記說燕國安樂爲劉禪所封雖立說不同不應并縣刪削互見幽州燕國

建平郡

劉達蜀都賦注有巴東北新井縣此有北井疑卽一縣沈志稱太康地志北井先屬巴東泰始五年度建平是也

南平郡

水經注澧水篇澧水又東逕安南縣南晉太康元年分孱陵立此作南安未詳寅案州郡志亦作南安云作安南誤又云分孱陵立亦非是攷南安分南郡之江安故曰南安則不當作安南矣

武陵郡

州郡志武陵太守下有西陽本志西陽疑卽西陽之誤寅案今各本已校正舞陽水經注作無陽寅案班志亦作無陽

天門郡

今本水經注澧水篇東標零陽西揭充縣廢省臨澧卽其地縣臨封縣之故治臨側澧水卽爲縣名晉太

康四年置。案文有譌奪。當云充縣廢省。卽其地立臨澧縣。太康四年置。援酈氏意。則不應二縣並列。澧水篇下又云。澧水東逕澧陽縣南。晉太康中置。州郡志。臨澧澧陽。太康四年立。例與監利等同。詳南郡。澧中水經注澧水篇。作婁中。寅案。州郡志亦作澧中。云二漢無晉太康地志有澧酈注作婁省水旁也。

長沙郡

劉陽州郡志作瀏陽。本書忠義易雄傳。長沙瀏陽人。當從州郡志作瀏。寅案。谷邱碑作瀏陽。古文省借。水經湘水篇。又北至巴邱山。入于江。注山有巴陵故城。本吳之巴邱。邱閣。晉太康元年。立巴邱縣於此。案州郡志亦作巴陵。疑太康初作巴邱。後改。東晉疆域志分作二縣。似誤。本書良吏傳。潘京與樂廣同時爲巴邱令。

衡陽郡

州郡志。衡山。吳立曰。衡陽。晉惠帝更名。本志列中篇。卽曰衡山。似誤。

湘東郡

水經注。湘水篇。臨烝。作臨承。又云。臨承卽故酈縣也。州郡志。僅有臨烝。無酈縣。疑只一縣。前後更名。本志不應並立。寅案。州郡志云。湘東。吳太平二年。分長沙東部立。晉世七縣。孝武太元二十年。省酈利陽。新平三縣。本志領縣七。與沈說合。又州郡志。臨烝。吳屬衡陽。晉太康地志。屬湘東。是臨烝與酈。太康時二縣并存。酈注誤。不可從。

零陵郡

漢春陵侯徙國南陽。故州郡志營陽郡下有春陵。云吳立本書忠義易雄傳爲春陵。令本志作春陽。誤。又案隸釋綏民校尉熊君碑作灌陽長。卽本志觀陽。古字通。寅案州郡志應陽晉惠帝分觀陽立本志應陽列中篇似與衡山同一舛誤。

邵陵郡

州郡志邵陽。吳立曰昭陽。晉武改。又云邵陵。二漢無。吳錄屬邵陵。今攷郡國志漢有昭陽屬零陵郡。又有昭陵屬長沙郡。吳因之。至晉武帝避景帝諱改爲邵陽。邵陵本志於涼州張掖郡臨澤下言漢昭武避景帝諱改此郡。何獨無注。又州郡志高平。吳立晉太康元年改曰南高平。後更曰高平。又州郡志邵陵太守下武剛令。晉武分都梁立水經注資水篇武剛縣左右二岡。舊傳後漢五溪蠻保此岡。故曰武岡縣。卽其稱焉。寅案零陵列應陽而邵陵不列武岡。此可見晉志之疏。

桂陽郡

元和志晉省便入郴縣。

武昌郡

案州郡志太康元年省蕪春郡以尋陽屬武昌。改蕪春之安豐爲高陵。及邾縣皆屬武昌。二年以武昌之尋陽復屬廬江郡。本志尋陽旣隸廬江。當斷自太康二年以後。何以邾縣高陵不列此郡。互見豫州安豐郡下。

安成郡

新諭州郡志作新諭。又州郡志安復本名安成。晉武帝太康元年更名。屬長沙。據此則太康初安復不

應屬此郡。寅案郡國志長沙下有安城。吳立安成郡。當治安城縣。晉太康初改安復。無由復。屬長沙。疑沈志當云本名安成。屬長沙。晉武帝太康元年更名也。今文似有倒誤。

揚州

丹陽郡

蕪湖州郡志作無湖。蕪無古通。寅案見州郡志淮南襄垣令下云漢蕪縣。

宣城郡

寰宇記石城縣。晉太康三年廢。入宣城縣。今攷州郡志石城令下無既廢復立之文。寰宇記當別有據。又案州郡志廣陽令。漢舊縣曰陵陽。晉成帝杜皇后諱陵。咸康四年更名。攷東晉縣邑以陵名者不可殫述。何獨改陵陽一縣。恐非實錄。後篇但言改陵陽為廣陽。不載避諱事是也。又州郡志宣城太守下云。晉武帝太康元年分丹陽立水經注沔水篇石城縣。晉太康元年隸宣城郡。本志作二年置。誤。

淮南郡

案杜佑李吉甫皆云。晉孝武避鄭太后諱。改壽春為壽陽。然攷本書帝紀。孝武之前成帝咸和元年稱壽陽。後至穆帝永和元年。又稱壽春。或據此疑東晉之初已改。竊謂本書於地理攷證。本屬疏舛。作史者追

敘其事。偶失檢正。不足據也。又案州郡志。淮南太守。秦立。爲九江郡。兼得廬江。豫章。漢高帝四年。更名淮南國。分立豫章郡。文帝又分爲廬江郡。武帝元狩元年。復爲九江郡。治壽春。後漢徙治陰陵。魏復曰。淮南徙治壽春。晉武帝太康元年。復立尋陽。當塗。逡道。諸縣。二年。復立鍾離縣。竝二漢舊縣也。三國時。江淮爲戰爭之地。其閒不居者各數百里。此諸縣竝在江北淮南。虛其地。無復民戶。吳平民各還本。故復立焉。云云。案沈氏說。則晉太康初。淮南郡縣名。雖仍舊。實則新立。本志不載。似闕晉典。又州郡志。逡道令。漢作逡逾。晉作逡道。寅案。地理郡國志。皆作逡逾。屬九江郡。

廬陵郡

樂史稱太康地志。廬江郡治皖。更移居於舒。水經泚水篇。東北過六縣。東注。云漢書所謂以舒屠六。晉太康三年。廬江郡治云云。本志治陽泉。未詳。又本書陶侃傳。廬江太守張夔。以侃領樅陽令。疑西晉卽有此縣。本志不載。後篇亦缺。疑誤。

毗陵郡

旣陽州郡志作暨陽。古字通。寅案。元和郡縣志云。本漢毗陵縣之溇陽鄉。晉太康二年置溇陽縣。旣作暨。又作溇。不詳孰是。

吳郡

州郡志富陽令。本名富春。晉孝武避鄭太后諱。更名。本志列西晉縣名。作富陽。誤。又州郡志海虞令。晉

太康四年分吳縣之虞鄉立攷本志中篇年分斷例不應列此縣見荊州南郡下

吳興郡

後篇言割吳興之陽羨立義興郡郭璞山海經注今吳興陽羨縣有君山爾雅注同史記索隱引太康地理志陽羨縣本名荆溪州郡志陽羨令漢舊縣不言晉廢復置是陽羨自漢歷西晉至宋皆有此縣不應與義鄉等縣並列後篇本志誤本書周處傳處爲義興陽羨人又武帝紀太康八年十二月吳興人蔣迪聚黨反圍陽羨縣又賀循傳吳平後嵇喜舉循秀才除陽羨令

會稽郡

郭璞山海經注句餘山今在會稽餘姚縣南句餘縣北故此二縣因此爲名焉見張氏地理志云云今案會稽有句章縣無句餘縣疑餘乃章字之誤蓋二縣各分一字爲名非晉志誤也又案水經注沔水篇南江又東北爲長瀆歷河口注引謝康樂云山海經浮玉之山在句餘東五里便是句餘縣之東山云云據此句餘縣名非特見山海經注他書皆有之恐晉時曾置句餘縣而晉志缺載也實案漢舊縣有句章有句餘山在南與郭璞注同不當復有句餘縣水經注句餘山在餘姚之南句章之北可證山海經郭注之謬

新安郡

郭璞注山海經云案地理志浙江出新安黟縣南蠻夷中東入海今錢塘浙江是也黟卽歙也云云案據

郭說東晉時已無黟縣。

寅案州郡志云黟漢舊縣不言晉省疑西晉時尙有此縣也。

又案水經注浙江水篇浙江又北歷黟山縣居

山之陽故縣氏之漢成帝以爲廣德國封孫雲客王於此晉太康中雖爲廣德縣分隸宣城郡再據酈說

則在西晉時黟卽宣城郡之廣德縣本志兩縣並存亦誤。

寅案水經注未盡可信郡國志有黟縣吳書同本志兩縣並存當必有據。

臨海郡

州郡志寧海令何志漢舊縣案二漢志晉太康地

下闕

攷沈志雖闕意蓋言太康地志無此縣以駁何志也。

東晉疆域志言樂史稱臨海記云晉永和三年分會稽郡八百戶於臨海郡章安地立寧海縣據此知寧

海實立於東晉穆帝時不應闌入中篇又州郡志橫陽令晉武帝太康四年以橫莫船屯爲始陽仍復

更名攷橫陽旣更名於太康四年之後本志載入與秦寧二州不一例說見荊州南郡下。

建安郡

本志張掖郡下例書避諱更名此郡邵武亦以昭武改應補載。

晉安郡

州郡志溫麻令太康四年立例說見荊州監利縣。

豫章郡

州郡志豫寧侯相漢獻帝建安中立吳曰西安晉武帝太康元年更名本志作豫章與沈志不合水經注

贛水篇。又北逕南昌縣城西。建安中更名西安。晉又名豫章。若從水經注。則豫章卽南昌之改名。又不應兩縣竝存也。水經注又云。循水出艾縣東北。逕豫章寧縣。故西安也。晉太康元年。更從今名。則又與前說稍異。然以西安推之。亦不當復有南昌。而州郡志則有南昌豫寧。未解孰是。庾案豫寧卽今南昌府屬之東北。逕豫章寧縣。故西安也。章字衍。當作逕豫寧縣。贛水篇。建安中更名西安。晉又名豫章。章字當作寧。循水卽漢志之循水。艾縣。今義寧州也。循水。今謂之奉新。江翊寅案。郡國志注引豫章。章字當作寧。中立是後漢舊有豫章縣也。州郡志。豫章太守下。豫寧侯相。云漢獻帝建安中立。吳曰。豫章縣。建安元年是後漢舊有豫寧卽豫章之譌。今攷豫章水名在漢海昏縣地。元和郡縣志。海昏故城。在豫寧縣東三里。昌邑王賀所封。寰宇記云。建安中分海昏縣立西安縣。晉太康元年。改爲豫章。又云。循水出艾縣。東北。逕豫寧縣。故西安也。晉太康元年。更從今名。鄴君於南方水道攷訂本疏。此二注尤屬舛謬。案南昌縣爲豫章郡治。莽曰宜善。後漢復舊。不聞建安中。以南昌爲西安。亦不聞晉改豫章。至豫章爲建安中。分海昏所立。吳曰。西安。晉太康元年。復改豫章。仍漢舊名。與南昌無涉。今鄴注。乃混南昌豫章二縣爲一章字。亦屬舛會。案鄴注。循水出艾縣。東北。此卽漢志。循水之譌。後漢書注。艾縣。故城在建昌縣。亦與南昌縣絕不相涉。晉太康中。南昌豫章二縣並存。未聞有改。鄴注。牽混。殆不可從。劉氏序說。失攷之甚。

臨川郡

州郡志。南城男相。漢舊縣。晉武帝太康元年。更曰南新城。江左復舊。此篇缺新字。

鄱陽郡

州郡志。上饒男相。吳立。太康地志有王隱地道無。

廬陵郡

南野當屬南康見下

南康郡

州郡志南康郡下云南野伯相漢舊縣屬豫章郭璞山海經贛水注今贛水出南康南野縣西北是晉南

野縣當屬南康也庠案郡國志無南野縣南野縣在今南安府南康縣西南為大庾縣境庾仲初謂之大庾嶠水

又州郡志寧都吳立曰楊都晉武帝

太康元年更名本志無寧都寘案華校亦云此志疑脫南野寧都二縣

交州

合浦郡

沈志朱盧吳立晉始晉武帝立今缺

交趾郡

交輿當從州郡志作吳興又州郡志九真太守下軍安長何志晉武帝立太康地志無此縣而交趾有

軍平縣本志兩縣俱無未詳水經注葉淪水篇越敗安陽王下船逕出於海今平道縣後王宮城見有

故處晉太康地記縣屬交趾志缺羸隸州郡志作羸婁謹案地理志作羸隸孟康曰羸音蓮隸音受土

廣韻始有羸字說文玉篇無則羸乃六朝後字也當從漢志作羸隸

新昌郡

東晉疆域志云。太平御覽引方輿志。吳置新興郡。晉改爲新昌。本志直云吳置。未詳。序案。交州前篇。孫皓三郡疆域志誤也。又立新昌。武平。九德。

武平郡

州郡志。九真太守下。武寧令。吳立。何志。武帝立。太康地志。無此縣。而交趾有。攷沈氏於太康地志。僅舉交趾一武寧縣。則此郡之武寧。太康志決不載。本志似屬重出。

九真郡

漢梧。沈志作津梧。云晉武帝分移風立。寅案。局本晉志亦作津梧。據畢校改。

九德郡

陽遂。沈志作陽遠。都浚。沈志作都沈。

日南郡

州郡志無。勞長。晉武分北景立。比景。沈志作北景。又壽冷令。晉武太康十年分西卷立。寅案。今志並缺。蓋據太康三年

爲斷。

廣州

南海郡

州郡志新夷令。吳立曰平夷。晉武帝太康元年更名屬南海。

始安郡

州郡志熙平令。吳立爲尙安。晉武改案本志常安熙平並列。豈晉武於熙平縣外別立一縣耶。抑誤增也。未詳。

始興郡

劉逵吳都賦注。桂竹生於始興小桂縣。東晉疆域志。桂陽一名小桂。陶侃執劉沈於小桂。卽此。州郡志作桂。疑此縣在漢名桂陽。及吳晉竟稱小桂。疆域志因晉志作桂陽。故調停其辭曰一名小桂也。

蒼梧郡

州郡志臨慶內史屬縣。有寧新令。云二漢無。當是吳所立。屬蒼梧。晉太康元年更名。又蒼梧太守下云。晉武帝太康元年改新寧曰寧新。又州郡志丁留令。晉武帝太康七年立。寅案畢沅曰此志不載或後省至宋初復立也。

鬱林郡

州郡志。安始令。吳立曰建始。晉武帝太康元年更名。今作始建。誤。又桂林太守屬。有安遠令。晉武帝太康六年立。屬鬱林令。作安廣。誤。柯林。當從漢宋志作阿林。

桂林郡

州郡志云永初郡國有長安夾陽二縣。夾陽晉武帝太康元年分龍岡立長安。太康地志有王隱無。又陽平令沈約案晉武帝太康元年立桂林之洋縣。疑是攷本志洋作羊平。龍岡作龍剛。不列夾陽長安。皆誤。

高興郡

庠案本志交州前篇明云漢順帝分交阯立高興郡。靈帝改曰高涼。而廣州高涼高興郡下皆云吳置。自相牴牾。疑靈帝改高興爲高涼。吳又復置高興。與高涼並列。晉初仍吳制。而志不能悉其原委耳。又案廣州前篇云吳黃武五年分交州之南海蒼梧鬱林高涼四郡立爲廣州。是黃武時尙未置高興郡也。

案明板晉書陽作黃陽。然攷州郡志有莫陽令。晉太康地志有屬高興。則黃陽又莫陽之誤也。寅案今局本亦作黃

寧浦郡

案明板晉書道作連道。然攷州郡志興道令。太康元年以合浦北部營之連道立。則連道又興道之誤也。寅案局本亦作連道。畢校同。州郡志又云潤陽令。晉武帝太康七年立。永初郡國作簡陽。又云始定令。太康地記

有。今皆缺。

陽湖方君博覽多識。夙承庭聞。於輿地歷算之學。靡不綜覈。淹貫。著書滿家。光緒己卯。侍其尊人元徵先生。駿觀於徐州邸舍。成新輯晉書地理志一卷。糾謬拾遺。辨證翔實。典午一朝。建置沿革。藉可攷見。厥功甚偉。同時劉君慈民。庠亦覃精此書。閒有商榷。益徵完善。比客廣州。已校刻算術數種。此稿寫定未竟。而君遽歿。傷已。昔江醴陵謂史莫難於志。而志地理尤難。漢代地志。創自孟堅。聞見既真。典籍尤備。然象郡之罷。不詳置於何時。廣宗之封。未載隸於何地。晉司馬彪。踵成郡國。前軌可繼。疏漏尙多。劉昭補之。庶幾無闕。惟安順以後。郡縣分并。槩置不書。泊乎三方鼎峙。疆域相錯。僑置遙領。莽如亂絲。承祚國志。未暇整比。金行革運。吳蜀一家。王隱、虞預、臧榮緒、蕭子雲、何法盛、謝靈運。皆撰有晉書。歷宋及隋。存佚相半。唐初史臣奉敕脩纂。於地理學最爲不精。其閒斷限。復乖體裁。舛午異同。難可枚舉。君以沈約州郡。魏收地形。採擇詳確。足資佐證。至於晉世起居。太康地道。雖書已散逸。而說可引徵。其見存完帙。如元凱左傳之釋。善長水經之注。於晉代沿革。首尾具在。他若皇甫謐帝王世紀。京相璠春秋地名。常璩之述華陽。郭璞之箋山海。王隱地記。闕駟州志。皆二晉英流。習於掌故。其所撰著。裒輯尤勤。下逮元和郡縣。太平寰宇。凡涉方輿。閒加搜討。而輒據唐以前書爲之標準。至其斷限。以太康三年爲主。其識可謂精且卓矣。時粵中方開書局。廣蒐乙部。獲觀此彙。錄以付棗。翊寅末學。夤陋。校讀之下。謹綴所聞。匪敢獻其一得。亦以助煇燭之照云。光緒十有七年二月。同里吳翊寅謹跋。